

四庫全書

集部

欽定四庫全書

太倉梯米集卷七

宋 周紫芝 撰

詩四十一首

姑谿書報錄近作因寄宣毫越簡

五雲書札何時得古錦詩囊久未傾
急遣能言管城子仍煩解事褚先生
飽霜穴兔秋方健照雪溪藤搗更精
南鴈去時人尚遠雙魚欲到眼先明

次韵王次卿喜劉元亢登第

劉郎才思似春閒
文在阿房季孟間
盡把胃中着雲夢
還從筆底看波瀾
我無富貴詢唐舉
人說科名汙次山
馳馬行看歸舊物
舞衣先喜慰親顏

奉酌韋深道見寄詩

蓋世功名豈不佳
韋郎心事本烟霞
秋風自老千章木
春雨誰分一部蛙
夜鶴政愁雲出岫
鱸魚會遣客思家
從君細意論幽恨
準擬應須到落花

韋深道和詩且以書堅扁舟之約僕以禁烟歸

掃邱墓未暇先寄此詩

闕然不見十年餘借屋新來共一湖
已向雙魚逢尺素更因五字得明珠
子猷心欲隨烟棹摩詰居應似畫圖
會待龐公歸上塚便求奴飯馬青芻

次韵邦伯達春寒

嶺外梅花使已來江南正月未春回
頑雲放日歸蓬牖殘雪將寒入酒杯
便有社風催燕到何須羯鼓打花開
老子春事渾無意睡起羣書正作堆

高公墓 并引

起居舍人高公惠連余之妻曾大父也少年登進士第
以才名推重一時見知於章聖皇帝公博學多聞晚
喜陰陽地理書頗窺其妙嘗為廬陵守廬陵士子千數
而歲罕登第者咸歸咎于郡學公為卜地而徙之其後
劉公沆與歐陽文忠公皆第甲科卒踐二府曩時公之
諸孫嘗謂余言公之父少卿公與公之墓皆其手遷意
必能昌其後而今乃無祿仕者公豈私于吉之士獨不

欲其子孫之盛大哉無是理也宣和辛丑予避寇難屏
跡山間每飯餘輒曳杖逍遙于墓木之下遂作此詩

鬼謂

方臘

高公古遺直三年立螭頭載筆有公言高論肅冕旒少
年取巍科妙學窮九流晚窺青囊書穴地生公侯當時
千載人繼出歐與劉如何百年後零落歸山邱墓門梗
荒棘長松泣高秋佳城定天與政自非人謀我來倚墓
木伴客聊遨遊斗酒與隻雞誰為橋公羞

次韵章季常題石魚研屏

蒼崖百丈懸江濱江潭下躍吞舟鱗戲將雙影倒掛崖
石上妙絕始信陽侯神短屏誰為琢山骨與君一障西
風塵世間百怪那可解清詩宛轉聊窮因問誰幻出水
底石掉尾鼓鬣波粼粼固應鳳咮與龍尾明窓淨几長
相親君家機雲好兄弟玉山對峙高嶙峋為貧聊試漆
園吏手板拄頰心看雲要收江湖入几席釣竿拂水垂
風綸誰當為我語石魚莫愛浪翻月白千頃江鎔銀但

願玉堂常伴直對此風流千載人

次韵何丈即席

春風無力柳嫣然花欲爭春作意妍坐上詩成雲態度
樽前人鬪玉嬋娟鳳簫初暖參差竹檀板還催大小絃
惡客正應妨作樂主人渾似孟公賢

次韵子容池亭晚思二首

便到青雲尚黑頭有亭莫賦二宜休如君豈是池中物
要趁官閑作浪遊

漫叟江湖間 日月輞川圖 畫小池亭謝郎春草有新句
付與老人雙眼青

次韵次卿林下行歌十首

風吹蘇小門前柳 雨暗羅敷陌上桑 遙想錦江春色暖
被花惱得少陵狂

聞道全家隱鹿門 竹籬茅屋寄江村 龐公事業無多子
只有平安遺子孫

事向閒中種種休 春來林下興還幽 上山雙屐與誰着

掛杖百錢時獨遊

郡郭東邊是草堂
岩花時雜澗花香
愁從把酒杯中少
日向讀書窓下長

愁多應怪獨醒人
心事全憑麴米春
醉後逢花堪一笑
狂來曳杖却成真

身世無營策最良
年來幽事不多忙
飢牛欲起方朝露
種豆纔歸又夕陽

賣酒繒魚只數家
卜鄰元在水之涯
扁舟定自桃源去

斜日紅飛兩岸花

人情危甚劍頭炊未可雲鵬笑一枝冠冕窟中元不到
雲山堆裏復誰知

得酒固應聊復飲有田何苦不親耒客來深巷聞雞犬
便是淵明歸後居

勃窣蹢躅不上堤却來林下小徘徊已知脩竹有千畝
更為桃花求百栽

聞蛙

草合平溝漲綠醅。亂蛙聲在古城隈。何時細雨春風夜
還我西池鼓吹來。

次韵趙鈴飲次卿家時牡丹盛開而僕不及見
揚子草玄仍有居河間好事復多書。獨來林下相尋處
醉倒花間得句初。人去不知紅爛熳。春殘忍看綠扶疎。
明年許作樽前客。準擬籃輿喚阿舒。

林間燒笋戲作

蒲山稚子欲翻籬。莫管春風上畚時。來伴野僧參玉版。

不知今日已茶毗

夜讀父子書其尾

萬里投荒海一隅八年蜚子與同居可憐金殿鑾坡日
渾在蠻烟瘴雨餘竒怪誰書方朔傳滑稽空著子長書
不知平日經綸意晚作兒曹一笑娛

雨意甚濃方起而止

欲成凍雨又吹殘香稻垂垂不救乾謾對醵雲訟風伯
還將火傘付炎官未容漲綠浮烟艇且看晴雲轉玉盤

誰與天工論赤地盡傾銀漢作波瀾

次韵趙明叔喜雨不寐

雲忽油然雨沛然黃童白叟盡成顛喚晴鳩婦鳴屋角
飽水秧孫明稻田御史平冤魂亦喜弘羊言利死誰憐
草玄窗下子揚子涼入孤燈夜不眠

送强幼安

慈固必能勇剛亦能近仁內往色徒厲定知非仁人强
公本仁者笑語生陽春散為三年澤不及千里民庖恩

出豈弟雅量含清醇應容盜恥擅肯叱吏吐茵誰知乃
中剛臨難氣益振前年攝虎符折衝如有神隣封墮賊
手齒寒已亡唇孤城危纍卯夜臥寄積薪清詩見橫槩
高會開重閨羣奔竄孤鼠萬刃抗一身豈但虎渡河遂
使盜入秦至今忠義士不數遠與巡嗟我挾策子繆作
升堂賓忠風激中腸別語聊重陳公議誰能掩偉績終
難湮陰功及黎庶天語形絲綸富貴當自茲照眼功名

新賊謂
方臘

東坡老人居僭耳嘗獨遊城北過谿觀閔客草
舍偶得一翦笠戴歸婦女小兒皆笑邑犬皆
吠吠所怪也六月六日惡熱如墮甑中散髮
南軒偶誦其語忽大風自北來驟雨彌刻

持節休誇海上蘇前身便是牧羊奴應嫌朱紱當年夢
故作黃冠一笑娛遺跡與公歸物外清風為我襲庭隅
憑誰喚起王摩詰畫作東坡戴笠圖

婁黥菴納涼

婁縣無骨可封王生事全憑藥一囊閉戶翻經頭已白
開門延客酒初嘗竹從春後知無數花自山來別有香
未有數椽容我老聊分一榻借君涼

晚浴崇教寺

閒居誰與遊幸此招提隣時乘下澤車訪我物外人往
往聽魚鼓相隨作朝昏齋得飽佛飯暮浴霑僧巾情熟
自不厭無求亦何嗔我生束世故欲解未有因願丐一
滴甘為洗千劫塵無冠顧安整有衣聊自振道人小軒

窗池淨花色新芭蕉過微雨蒼翠爭繁筠勁節秋益好
柔葩委管榛豈但娛老眼亦足觀是身歆眠寄靜榻小
休只逡巡茶甘猶在口龕燈已前陳日暮行當歸擊柝
催重闥

次韵元傑暑中書事

劉郎家世盡名卿晚歲憐君尚帶經道在莫嫌榆歷歷
詩高何媿草青青杜門不出人應笑與世相違我獨醒
誰與林塘共清夜綠荷時照兩三螢

次韵李子澤中秋無月

月在愁雲黯淡中
綠樽誰與共秋風
君家自有人如玉
嫋嫋停停似楚宮

次韵春卿遊黃蘗道場

長安多貴人被服
紫寶帶名字垂
鼎彝功勲壓崧岱
一懷上蔡悲樂事
鍾我輩知君汗漫
遊食蛤據龜背若
若笑痴兒洋洋飛
大蓋梯空瞰千山
閱此烟雨態小閣
亦何有長松颺微
籟聊將身世夢淨
洗佛祖戒行樂要
及

時幸此無籍在只今況豐年未黍已旆旆狂風不鳴條
積雨不破塊賞心失幽期噬臍有餘悔曉猿尚未驚斯
遊君勿怪便當買薄田往抱躬耕耒

八月二十一日大熱夜半微涼

八月大地千里赤蓐收權輕苦無力未許寒蟬飽風露
聊為秋蚊增羽翼蒲葵呼扇腕欲搖絺綌捐衣汗猶滴
誰遣秋風半夜來先向高梧寄消息

和李似表丞廳梅發用胡士曹韵

江頭雪屋知誰家雪中冷艷空爭華不知何郎閉東閣
坐看江梅初著花谷底春回猶未透天寒袖薄姿微瘦
黃昏有月誰復知舉世無花出君右人生一月幾胡盧
杖猶在手霜滿鬚湖邊孤坐不飲酒西湖處士空清臞
知君不學崔斯立幅巾漫對枯松株缺心雖冷白自勝
金縷醉歌歡豈無明朝花在有新句詩成阿買還當書

次韵次卿約尋梅二絕

擬摘寒梢一點春佩囊無句久生塵尋花曾得王郎意

應為江梅似玉人

想得瑤林玉樹春
高標元自出風塵
殷勤欲共梅花笑
却恐梅花解笑人

寄題折將軍家忠勇堂
折有邊功上賜大旗御
書忠勇二字以表其功
將軍因以名堂

折侯古將家
雄筭讐邊土
將軍最晚出
驍勇不媚嫵
十年守雁門
飛矢射猛虎
平生程不識
不作一錢數
誓言大宛馬
唾手端可取
夜半奏捷書
歡聲曉飛舞
雲旗塗

黃金彩錯映寰宇談笑開華堂忠勇揭天語功成倘堅
壁鎮靜古所與何當使敵人開戶玩處女置酒日高會
緩帶擊歌鼓要令無智名折衝在樽俎

東牆橘將熟催以長句

木奴嫋嫋半垂墻故惱幽人苦未忙雨細不妨無賴綠
簾疎時與可憐香誰將磊落黃金顆為賦甘酸白雪囊
只有天公真解事便須先借滿林霜

夜宿東寺雪中寒甚

古寺初投簞荒陴已授更雪飛穿幕片風作撼窗聲今
日招提境當年敵騎營可憐王處仲江上築孤城

哭普兒

胷中欠梨棗種此無明根造物初戲劇憂傷裂心肝奪
我破殼雛長鳴猶未翰况乃渥洼種墮地已足觀此理
竟莫曉老淚空闌干端如卜子夏淚盡雙眼胷母哭不
忍聽聽之鼻辛酸人言有子爾欲遣吾心寬有生無短
長視死同一歎曉人當如是自曉終為難究竟無奈何

哀哉亦何言安得大靈龜騎雲歛天門

太倉梯米集卷七

欽定四庫全書

太倉稊米集卷八

宋 周紫芝 撰

詩五十九首

次韵答子容三首

載酒念疇昔幽情日相過十年登鬼錄奄冉今已多舊
盟難重尋俗子終殊科只今驚大巫為我驅妖魔但恐
費推挽勞君戒蹉跎願隨翩翩子徒倚南山阿

二

老懶不出門，泯默抱窮獨。賴此千載人，洗我雙病目。公
思如懸河，傾瀉歸四瀆。我如晉井泉，鑿地日不足。幸分
一滴甘濡此，將槁木行當奉周旋。歸囊粲珠玉。

三

故交天一涯，塗路困脩阻。新交同一邦，對面日晤語。知
君相知心，政在疊疊處。朝侵窮幽深夜床，同曉雨似聞
梵然音振翮。便輕舉，俗物多敗人，公其勿輕許。

次韵蘇如圭乞貓

蘇侯家四壁每飯歌權輿庾郎鮭菜盤三韭羅春蔬飢
鼠竄旁舍不復勞驅除何為走老黥貫魚乞狸奴頗知
紅錦囊萬卷家多書我時醉着帽過子城南居手擎烏
絲欄棐几自卷舒寒具久不設蠆尾亦足娛猶恐遭咬
齧備豫須不虞狸奴當努力鼠輩勤誅鋤無為幸一飽
高臥依寒壚

食蛤蜊一首

舊聞若士昇中天俗眼未識烏鳶肩據龜食蛤結汗漫

盧敖尚青遊人間高談謾罵沈昭畧坐視元長嗤稚弱
更言且共食蛤蜊忿氣難平兩譏謔下臨無地高無天
更作兒女爭姪姪平生我亦笑二子豈知真味含芳鮮
何如結屋清江曲風雨關門酒初熟自烹折鼎吹濕薪
笑倚胡床摩醉腹但願年年對蛤蜊一杯薦我梨花玉
演師跳珠泉

阿麼事窮奢供億在寰宇雲錦張風帆明珠濺飛雨須
臾就變滅慶弔只仰俯何如西山泉迸石互吞吐尋源

上層巔流脉下深塢散作跳空珠纍纍不堪數雖無千
金賞玉漱羅堂廡道人得摩尼夜光還合浦不知方外
士得失兩安取此意誰復知寒流自千古

瓊師蒼簑軒

絕境渺天末招提入雲端汪灣一溪水似與山屈盤僧
房各上下處處聞驚湍道人更幽獨開窗對檀欒細雨
洗輕碧微風生暮寒雲梢自裊裊玉佩時珊珊繫我絕
韻友久結無情歡相逢如故人棄置良獨難婆娑弄清

影夕陽殊未殘何當分清陰與子同考槃

蠟梅一首

彼美青樓倡顏色豈不好春風桃李花過雨堪一掃
繁星冠女雲宮在三島霧帔卷黃羅披風出雲表焚香
禮夜壇香霧生杳渺恨無脂粉顏千金聘嫋嫋劉郎竟
不來含顰弄清曉誰憐傲霜枝照眼自明瞭永懷蕊宮
姿微黃淡飛標清蟾耿寒枝與月自相惱真賞久未逢
殘英惜空老

次韵雷飛卿雪中掉小舟見過

別時江上草離離相見寒枝欲放梅
目送征鴻天外去夢驚烟棹雪中來
青雲誰料未千里白髮政須同一杯
老日相逢能有幾春花欲動莫先回

次韵似表謝胡士曹分梅花

李侯自以詩名家詩成與月爭霜華
誰將尤物調韵語拄笏騎曹分好花
花寒力淺香微透惱亂詩翁作詩瘦
對花欲作楚狂顛草賦誰居廣平右
但愁急管吹邊隅

便應買酒煩長鬚參橫想見綠衣舞月中
笑語花微臞
天香艷艷與誰好
君家兄弟元三株
明日新詩入花萼
人間此事應久無

唐李又兄弟同集號華萼

可憐多病閉門叟對月

痴坐空中書

雪中過慶老方丈

雲滿江天雪意酣
擁爐聊復聽巴談
老人不出真藏六
來客何勞說後三
已借團蒲搖短夢
更澆春餅薦餘甘
此生試向閒中看
何止人間七不堪

次韵答春卿尋梅

霜梅橋立清江濱誰當為挽歸來魂青鞋醉踏江沙路
玉蕤簪帽驚王孫臨風想見花有語此郎詞賦如文園
花開無情落亦易聞香當歎知誰門怕看落地白雪滿
便恐綴枝青子繁溫風明月不易得繞樹莫放花黃昏
知君共醉有佳客此意歸來誰與論煩君與問花無恙
尚堪一笑同清樽

飲沈都曹家梅花下

時東南已擾

去年夜走山百盤山中飛雪朝漫漫不知春向夢中盡
更有梅花醉後看今年冬溫寒力軟春入梅梢已堪剪
插花重飲故人樽猶得一枝供細燃豈知聚棘避戈鋌
還對粉香驚婉孌花前楚客狂欲顛月下吳牛空自喘
明年尚恐賊連營零落肯教花滿眼只今猶可醉餘香
杯行到君莫嫌滿

次韵舒天用元夕觀燈喜甚成詩二首

河陝櫓搶漸欲平不應戎馬尚連營聲傳萬井燈花麗

月到中天夜氣清
爛醉且須遊閨苑
論功終合擬長城
歸來袖手無人識
喚作風流阮步兵

樂事悠悠不繫情
生涯狗苟復蠅營
嫌渠燈燭紅紗亂
為我歌詞白雪清
豈料脫身歸故國
可憐行樂記王城
開元盛事元如許
何日中原不用兵

次韵元司理元夜三絕

火龍銜燭御城遊
喜入昇平四百州
惆悵長安今夜月
為誰重上漢宮樓

憶得襟真池上春水晶簾底看燈人當年京洛隨車客
今夜江湖臥病身

花落殘缸睡味酣九霄誰正夢傳柑百千燈滿虛空界
半夜回光獨閉菴

次韻同舒天用和元侯三絕

舒郎人物是清流不解蒲萄得一州郡守無燈亦行樂
也隨賓客上江樓

亂離燈火不成春月下歸時有幾人我老尚堪陪一笑

世間無似此間身

遊騎歸來尚半酣一杯誰與覓頭柑
小窓夢斷龕燈在影落疎梅月上
卷

菖蒲山子歌

南人生長在山間家家有窗窗有山
吳峰楚嶠不知數但見雲埋雨洗堆
烟鬟誰知長安綺紈子一拳何處鑿
雲根陽侯疏鑿出岩穴上有欄斑皺
蘚紋下有千歲不死瑤草蒼鬚繁
痴兒持此矜王孫朝攜硯礪登朱門
暮

擁紅旌辭帝閤開元承平二十年四邊無警言不控弦綉
衣半是花鳥使達官避路誰敢言大編寄我春浪碧處
處爭看太湖石天心不肯乾太湖八州萬口空嗟吁累
石作山齊華嶽千峯萬巒撐碧落樛龍夭矯攬雲雨
彷彿去天無一握錦帆東下飛龍舟咸陽苑籞空蕭
索杜陵野老哀江頭菖蒲之山兮誰爾留

次韵羅仲共山村題咏十首

晏坐銷長日禪心薰妙香已成三折臂安用九迴腸

二

花片風前落江流雨後渾
少陵新得句應似浣花村

三

喪亂何時定江村愁殺人
日長空有睡花不成春

四

老去家無定名高席未前
如君尚窮約誰與問蒼天

五

避地成真隱依山結草廬
此身無籍在隨寓即成居

六

北闕書難上南方賊未誅諸公在廊廟誰與問唐虞

七

欲問濯潭路懸知隔數村曉來茅屋夢相對飽朝暄

八

有醉銷千日無詩學四愁幾因君得句技癢不能休

九

塞北兵戈滿竹西歌吹空何堪故鄉夢真在白頭中

十

兩國兵難解三春花自飛愁因春鳥喚心逐暮鴻歸

次韵草堂主人雨中十首

反鎖衡門誰復開草堂殊不見兵埃雄風斜卷雲頭去
雌霓橫遮雨脚回

有家憐我無鄉地好事知君不世情借得小窗安淨榻
臥聽風雨入荷聲

虎頭山下元無路龍骨溪邊尚有窗風裡荷花吹不倒

雨中鷓鴣自成雙

少年結客不思家
酒浣春衫白苧麻
今日江村烟雨裏
兵戈滿地髮雙華

滿谿烟雨濕芙蓉
綠葉紅花錦不殊
聞說宛西橋畔宅
小園無地不荒蕪

醉裡青春挽不留
眼前戈甲幾時休
溪邊雨細花吹盡
隴上風寒麥又秋

亂來歲月摠如流
頭白江村不奈愁
老罷此身何處着

尚堪同倚雨中樓

含桃熟後鶯還語
柳絮飛時燕亦忙
風物但隨時節好
不知人意自淒涼

浴鳬飛鷺下橫塘
花過鶯歸草自長
恰似碧雞坊口望
浣花谿上一茅堂

避地偷生只閉門
不堪搔首對醺尊
行歌野哭江頭路
雨葉風花揔斷魂

避兵遣懷六首

鳥噪烏江渡鯨吞白下州地分元帥重聲入敵營愁近
磔巡江尉將俘北闕頭兵行速如矢甲縫露羶裘

二

江濶烽烟冷城危戰騎驍敵從諸道入將擁潰兵驕萬
國書多壘三軍夜擊刁干戈空滿眼誰議築壇高

三

避地蒼黃夜悲涼郡郭西捫蘿危絕磴杖策困深泥掩
面憐痴女回頭愧老妻驚魂猶未定邊馬莫頻嘶

四

野宿寧堪度風飡寔自憐
妻孥渾在眼戈甲暗周年
夜月翻驚鵲炎天看跼鵲
射敵無一矢南渡幾樓船

五

心折來時路身行亂後村
土兵呵白晝野婦哭黃昏
賊去烟留屋人歸日在門
春陵四萬戶今日幾家存

六

閭闔乾坤大封疆四百州
蒙塵二聖哲伐叛六春秋
地

入強鄰濶官封悍將優奉天哀詔下感泣萬方愁

次韵常元明西坑見寄二首

西坑只在亂山間尋得仇池十九泉有句能催千嶂雨

無人共釣一川烟

南來敵騎欲凌川北嶺人家自燒原聞道西坑堪避地
擬尋雞犬問桃源

寒食雜興三首

寒食只數日天氣殊未佳輕雲澹微茫細雨吹橫斜青

春似無情不到愁人家
霽色忽浩蕩平原繡芳華
走馬惡少年挾矢射戟牙
白羽叫餓鳴舉網連五犯
會當斬長鯨封侯鳴鼓笳
時危何不有寒士空泥沙
凜凜羞俠氣悠悠但咨嗟

憶昔在京華醉踏長安市
長安白面郎快馬如流水
羅襦照暮春鬪草攜佳麗
就中五侯家雲幄耀金翠
九陌過香輶都人拾遺珥
歌喧樂佳節日暮多沉醉
榮華一消歇禍亂蒼黃起
北狩隨兩宮血屬六萬指
征車去悠悠

悠河水日瀾瀾浩歌哀江頭老淚不可止

北邙何巍巍高冢如魚鱗慨彼墓中士中朝稱貴人萬
金樹豐碑千金琢麒麟自從敵騎入亂離隔中原生者
各奔竄死者啣長冤子孫無奠享白楊悲餒魂戕戕纓
冠子往往無丘墳舉酒西北向野哭望白雲我今上先
隴覆杯松下根時危不自保全之殊酸辛

寒食夜月下作

一百五夜對明月二十七種無蔬枰莫嫌萬點飛花恨

且結三人對影歡
流落忽成身老大
亂離誰不涕闌干
顛狂自笑那能寐
立盡春風午夜寒

送詹伯尹丞涇邑

西溪寒食柳花飛
正是琴高欲到時
薄祿僅酬三釜志
新篇莫負兩松詩
催科未辨何妨拙
作吏能清不用知
高論平生期活國
一方疲瘵看君醫

題馮尉綠淨堂

不種平池玉井蓮
卷簾堂下水如煙
溶溶自漲晴江綠

脉脉還通暗谷泉誰道馮唐今白首始知梅福是真仙
客來莫吐青銅面要看蟾宮上下天

野飯


野飯聊娛老登盤春物佳
芼羹橫荻笋羹餅荐槐芽魚
尾初垂劍臺苗未着花
誰言庾郎瘦疏腹漸禁茶

明皇羯鼓圖

禁籞鶯聲外天袍擁御黃
曲名翻荔子春苑繞沉香
白雨花奴手風鬟舞馬床
向來歌吹地何處是漁陽

送智上人

道人飲山流顏色頗秀整經營一菴足偃蹇萬事屏忽
隨銅峯雲飛下銅峯頂欲了一大緣此意極勇猛白晝
多豺狼橫塗半坑穽為言普陀林誰能保腰領要憑降
魔力化作清淨境師亦初無言薄俗時自慳盡洗塵劫
冤願力周津溟瘦藤行可支慎勿厭馳騁



太倉稊米集卷八

欽定四庫全書

集部

太倉梯米集卷九至十二

詳校官庶吉士_臣李如筠

主事_臣呂雲棟覆勘

總校官編修_臣倉聖脉

校對官中書_臣高中

謄錄監生_臣范廷驊

欽定四庫全書

太倉稊米集卷九

宋

周紫芝

撰

詩四十五首

張載揚言揚州燕子無屋可居即船為巢命黃

叔魚賦詩今年春余始見叔魚詩于宣城遂

同賦

塞北健兒歸去日揚州燕子却來時空尋畫舸藏風雨
更為傍人話別離回首淒迷春水路傷心零落舊巢泥

斜陽不見烏衣巷一讀君詩淚欲垂

送呂右丞罷鎮宛陵

聖從

漢室承平久侯邦拱衛尊勲華垂日月展錯動乾坤
闢規模大紛更制作繁民勞箕歟日人痛鑿空痕鳴鏑
侵榆塞穹廬指鳳閣羽書飛始急魚鼎沸初渾內禪皇
圖遠春宮曉日暎羣妖悉植醢黃髮半騰騫公入登丞
轄忠稱自諫垣論思知蹇蹇屬意本元元躩躩資扶掖
奇虎力引援敦盤盟易失虎兕敵仍存轉戰知何已風

塵忽再昏倉皇趨帳殿奔北奔弓韃傾日心應折瞻天
眼欲睂徽音求太似基命本姜嫄大物歸明辟蒼生荷
國恩推符迎代邸結綬擁堯軒瀾上真人出塗山萬國
奔回天功不世徒突事堪論已復安西土猶煩護北門
要須調鼎手為洗泣隅冤萬杵堅城壘千兵列戍屯賊
鋒憂寇鈔原燎畏燒燔坐嘯初何事渠兇不足吞持平
本寬大餘事到平反論說波瀾濶提攜禮數蕃時懸徐
孺榻亦置穆生樽有客安圭簞忘機在鳥猿疾馳看騾

裊妙琢愧璵璠始下橫經帳還攀欲去轅月樓空窈窕
風旆舞纈繡竹帛勲猷著絲綸詔冊溫磳溪未容老琳
館且辭煩閼計今猶在忠懷不易諼白麻終拜相左衽
待稱藩巨蠹消奸宄良農植本根抗章陳上策補袞要
嘉言鎮薄敦流俗疏壅究治源微生有榮耀洗眼在山
樊

元素僻在草野羣盜縱橫久不得問新作鼎來
喜次其韻三首

兵氣纏滄海斜陽入暮林
魂傷春落絮淚濕晚啼禽
只有衣成結渾無髮受簪
殘生已飄泊老日更侵尋

二

自失雲橋路空傷烟樹林
天驕猶射月青犢未成禽
尚怯矛頭米空橫柱後簪
春光無賴好花落共誰尋

三

近聞君隱處茅屋帶平林
但可占鳴犢誰能黠展禽
書應聚淨几塵已暗橫簪
杖策終隨子雲山上百尋

同仲共兄弟訪趙行可行可置酒二首

倚杖山頭寺維舟柳下堤
莫催金駿裏且醉玉東西
亂後兵猶滿風驚鳥未栖
看君飛動意兩目在鯨鯢

二

坐客三珠秀王孫玉樹高
酒寧闕爾輩山合對吾曹
遊子家何定將軍戰未鏖
相逢莫相失羣盜正如毛

讀陳公葆真宮詩有感而作

念昔全盛日天子方祈年
崆峒擬問道桂館延列仙
葆

真號上宮柳色參雲烟方池下見底上映壺中天長安
二三月遊女飛朱轡蹢躅步金堤依約遺翠鈿芙蓉倚
紅粧弄影秋江邊我亦時結客曳杖相周旋不知客中
人有此稀世賢臨老誦公詩撫卷徒惘然

初夏

絮飛長陌又春餘綠滿菖蒲夏已初雙蝶不來花寂寂
一鷺時到樹疎疎平生懶作折楊曲萬事可占長柳書
只有故山真耐久伴人閑處作踟躕

賊退後經舊居

反側虞戈兵流離厭山谷師興解重圍亂定出荼毒提
攜望鄉關老稚甘趼足故里成邱墟門巷亡詰曲大木
亦已薪蔓草行可束東隣殺翁媪禍難云最酷白骨在
草間零落不相屬西家各奔竄係擄及僮僕當時黃金
囊掉頭不肯贖新交半亡沒變故誰記錄舉家竟何歸
寄食歎局促凶年大軍後旱氣日熇熇涸井不供炊垢
膩那得浴不知病瘦軀何以度蒸溽自從關陝亂威弧

殊未羈十人九無家蕩析豈所欲微生何足論主食久
不玉但願早休兵四海各安俗

憫雨歎

南方久不雨旱氣日益酷起視夜何其星斗燦滿目朝
雲藹空濛暮雨思霖霖雷師方鞭車風伯忽舞纛百神
各顛倒誰為調玉燭兩宮方蒙塵百執被驅逐萬里沙
漠行長征犯三伏懸知臣子心北望晉兩目願興膚寸
雲朝隣暮滲漉天公倘悔禍何止望一熟皇輿既言歸

壤地亦旋復誰當挽天河下洗憂憤辱

和人題徐獻可倅廳池蓮二首

風流別乘水中仙百丈新移玉井蓮試掉小舟花裡去
便如苔雪雨中眠

西風吹雨綠楊灣香滿紅粧一水間不把監州比螃蟹
看花誰似兩公間

毅果出示次卿詩編中有彭門見寄之作乃追

和元韵

往憶烏衣郎北走彭門道六年隔音容萬事掛懷抱相思枉停雲尺紙開小草為言清夜夢莞爾同一笑黃樓渺天末路遠何由到我亦仰屋梁恍若落月照神交見顏色此理固良妙撫事思少年相期在嵩少是時海內安王師未征討尚有邱壑姿可寄沮溺傲一從胡鷄驕斯民困征調一死抗賊徒奇禍發詞藻造物苦見憎與俗坐殊好微軀此棲遲長夜悲靜悄蒼狗變浮雲世事那可料傷心理白玉急景轉飛鳥幸此好事人遺編為

傾倒老眼條已明權門益慵掃

毅師以次卿詩編見示以二詩還之

雲錦當年事傷心不忍思江寒收骨後山晚斷魂時直
節君何恨天心我獨疑老懷無處著更復把君詩

二

人物忽掃地風流誰復知子猷心愛竹摩詰少能詩時
昔山林意殘年喪亂悲明珠在滄海好句莫多遺

蔡生縛瓊根毛筆戲書小詩

臥沙細肋策勲餘黠鼠何勞強挽鬚毛穎典型空復在
髯郎今已號中書

九日度折嶺

脩途苦悠悠行邁日靡靡間道避羣虎弛擔倦行李重
岡頗峻極一上三十里荆榛塞舊蹊設險防賊軌鑿空
破狼石猿徑僅容趾俯身視懸崖駭汗如流水回首問
僕夫倉皇謀進止鄧公固忠臣王陽真孝子經營能幾
何蹈歷乃至爾佳晨懷故鄉絕頂步屐齒醉帽落清樽

浮香嚼金蕊歲事行晏陰四郊復多壘浩歌歸去來吾
行且安埃

宿靈河寺

風飡倚虛壑險步躋雲梯驚魂棲客枕夜宿投招提殷
勤入簷月肯為幽人低滄海念橫流萬方喧鼓鼙胡為
困行役竄伏隨膚魔南枝越鳥巢北風代馬嘶耿耿念
徒旅依依懷故谿脂車待明發胡為尚栖栖人生如醪
飲暫聚還復睽百年能幾何行樂戒噬臍

秋霖歎

去年陰山雪平地三尺餘人言土中蝗入土不用驅今年歲枯旱野食無豆蔬西來三尺蝗舊歲雪不如秋田有遺秉未足飽一夫細雨生穀芽屯雲幾時舒群兇劇豺虎諸將勞驅除橫尸作京觀流血如決渠高穹厭殺氣荆棘滿郊墟尚復此恒雨未知當何如豈欲令斯民竟死不少紓天亦念赤子理豈有是歟會當開晴雲却返羲和車我廩雖已殫我地尚可鋤庶用種宿麥更作

來歲儲

次韵趙鵬翔秋夜歎

朝彈雍門琴暮歌梁父吟秋容日欲老客愁秋更深問
言愁何許萬里懷歸心昔在洛陽日頗遭邊騎侵骨肉
盡奔迸歲月良侵尋譬如痛定人當痛難重任辭親就
薄祿夜寢無完衾家亡河間書囊鮮鴻寶金誰能援一
臂使子無陸沉老驥得平坂驚鳳翔長林佳名一朝白
高義千古欽

山谷先生弔秦少游詩云少游醉臥古藤下誰
與愁眉唱一杯解道樽前斷腸句江南唯有
賀方回此以言語文字知少游者也余鄉人
有官藤州者謂藤人為余言少游既病洗沐
步上光華亭手持白玉杯命取江水立酌一
杯而逝嗚呼此豈徒然者哉東坡題少游自
作挽詞以為能一死生齊物我是真知少游
者也

古藤陰下偶婆娑
南北隨緣意若何
白玉杯寒亭上月
縷金衣斷醉時歌
還將萬里澄江水
盡洗平生綺語魔
能道秦郎解忘物
嶺南唯有雪堂坡

歲杪雨雪連日悶題六絕

春前舊雪連新雪
雨後春寒帶臘寒
殘日送年能幾許
一番風雨歲將闌

樹頭雪過梅猶在
地上春回柳未知
舊歲新年渾似夢
凍雲寒雨不勝悲

春回九地初頒歷人傍千門復看儼盡是漢家無事日
白頭扶杖意如何

去年代馬渡淮流江北江南處處愁破敵只今猶遣將
富民何日定封侯

鞭牛迎得春來了爆竹催將歲欲徂莫把流年作悲喜
人間萬事有乘除

大雪今宵一尺餘王春明日歲云初豐年已識天公意
上瑞仍煩太史書

凌歊晚眺

故鄉南望幾時回
落日登臨眼自開
倚杖獨看飛鳥去
開窗忽擁大江來
傷心不見姑溪老
抱病聊尋宋武臺
歲晚無人弔遺跡
壁間詩在半灰埃

次韵伯尹登嚴子陵釣臺

明光宮中梟夜鳴
漢鼎何人窺重輕
老體未汗屬鏤血
四海掩鼻愁羶腥
當時避地豈得已
嚴棲水宿俱非情
誰知舉世無真隱
此意獨高嚴子陵
一鉤明月滿蓑雨

桃花水漲春江平生涯頗似玄真子端欲釣魚非釣名
故人已作飛龍起猶着羊裘釣烟水異時候霸豈其傳
未可輕將袞衣比心知不為世人屈無故不作三公耳
富貴浮雲只眼前執戟長憐子揚子丈夫名節倘未立
安用區區識奇字

環翠亭

客意長隨倦鳥還翠屏空夢小屏願更將臨老雙愁眼
來看平生未見山西子為誰顰遠黛湘娥何事髻烟鬟

千岩萬壑無人處便是輞川圖畫間

種德亭

萬緣宜作夢時看只有情田種德難但把胸中著梨棗
不愁庭下欠芝蘭倡條冶葉渾無賴錯節盤根頗耐寒
莫笑襄陽龐老子全家長享鹿門安

蔡澄源錄三家詩見借各題一詩以還之

翰林才大今師伯目短曹劉數仞墻我亦當年曾問字
雲泥無路可升堂

早時得句唾成珠晚歲分符雪似須聊復把公詩過日
何心賦我食無餘

少年湖海識元龍老去功名事已空筆陣舊知無與敵
詩城今復有誰攻

睡起有感

日長誰復歎幽扉睡到斜陽恰盡時缺月要圓雲未肯
青春欲老絮先知天於我輩元無分夢比人間更不疑
門外故人千嶂遠燈前華髮萬絲垂

次韻伯遠春雪

風寒欲下欺春雪天近先垂壓地雲堆得樓頭成玉色
吹來酒面作波紋憑陵暖日竟何事調護新花誰解紛
溫詔始聞如挾纊九重應復念三軍

光武二十八年五溪蠻反馬文淵年六十三矣
踴躍請行卒致困敗班定遠久在絕域上疏
請歸詞甚切至其畧曰臣不敢望至酒泉罷
但願生入玉門關遂老中朝辛亥季春三日

燈下讀此二傳感而賦詩

平生長歎馬文淵功業遨遊二帝間
洛社龍飛初有意嶠南鳶墮不知還
雖迷槃瓠壺頭路肯愧祈連冢上山
政坐不如班定遠乞身生入玉門關

題趙周賓家夜獵圖

翰林作醉石偶似蒼於菟龍眠見之笑
為作匹馬彎彫弧云是將軍出夜獵
上有仇池行草書雲沙蒼茫日欲下
道逢伏虎南山隅心知是虎不是石
雙弦急控皆盧

兵明朝白羽飲碩石摩挲欲盡金僕姑君不見賜累千
金新垣平連佩六印樂將軍致君大畧豈在爾封侯細
事不到君先生言語妙天下瘴海七年皮肉皺邂逅英
物數蘓李曹蜍如生亦如死龍眠有眼識天人異世同
成一奇事君當什襲勿漫摹此人此畫人間無

五禽言

余避賊山中婆婆岩壑間終日寂然不聞人聲惟春禽
嘲哢不絕于耳乃用其語效昔人為五禽言亦山中一

戲事也

婆餅焦

雲穰穰麥穗黃
婆餅欲焦新麥香
今年麥熟不敢嘗
斗量車載傾困倉
化作三軍馬上糧

泥滑滑

山中流水聲
聒聒春禽說雨春
泥滑誰為春禽語
莫報幽人明日雨
幽人明日欲上山
山頭雨足花爛斑

提壺盧

提壺盧樹頭勸酒聲相呼勸人沽酒無處沽太歲何年
當在酉敲門問漿還得酒田中黍穗處處黃瓮頭新綠
家家有

思歸樂

山花冥冥山欲雨杜鵑聲酸客無語客欲去山邊賊營
夜鳴鼓誰言杜鵑歸去樂歸來處處無城郭春日暖春
雲薄飛來日落還未落春山相呼亦不惡

布穀

田中水涓涓布穀催種田賊今在邑農在山但願今年
賊去早春田處處無荒草農夫呼婦出山來深種春秋
荅飛鳥

水西壁間見呂居仁絕句次其韻

秋霜落後題詩處醉墨淋漓苦未乾不見窮愁孟東野
亂峯空鎖一溪寒

太倉稊米集卷九

欽定四庫全書

太倉稊米集卷十

宋 周紫芝 撰

詩四十四首

題聖龍泉時方避賊山中

泉聲來自古龍湫山底驚雷萬壑秋
濺電打窗空破夢飛流無盡不湔愁

次韻伯尹食糟民示趙鵬翔

十年用兵九不熟人家有田不種穀
盡枯膏血作軍儲

却買官糟貯飢腹富者鬻田貧鬻妻夜困桁楊曉敲朴
長腰一粒不下咽輸入官倉常滿屋昔年貫朽內府錢
諸公何苦開漢邊自從代馬飲江水便恐黔首流飢涎
黃塵白骨尚滿眼錦裘繡帽誰當前烹羊炰羔固不惡
飢民食糟真可憐元侯幕下短主簿肯與斯民作調護
不愁吏考拙催科寧脫青衫賦歸去詹侯老文稱大手
樂府詩高古無有安得狂歌徹聖明便叱風雷清九有
却驅羣賊作良農還我昭陵舊丁口

山中避盜後十首

喪亂今猶爾安危了未分
叛羌初射月羣盜忽如雲
妙畧歸諸將深憂軫聖君
灞陵逢醉尉應有故將軍

二

避地今猶雪移家春復深
豈無花到眼可奈鳥驚心
茶動容時摘蘭香得細尋
山中有幽事青攢未成禽

三

浩蕩奔流急倉黃突騎來
擁旌方滿目縱炬已成灰
去

踏青山道歸看白骨堆須煩郭中令一為洗氛埃

四

橫道俱蛇豕親交信絕疎別來應隔歲亂定始收書轉徙移家後存亡雪涕餘微生一螻蟻播越念皇輿

五

夜燧餘三月新愁有百端驚魂頻雨泣枵腹任風餐射雉山居險薰狐穴處難敵來猶可爾寇至不勝殘

六

黯慘春歸日荒涼賊後村鼓猶聞去寨火未息平原不
恨室廬盡重欣老稚存此方惟是燒亦復飯王孫

七

今日報賊去下山猶復遲羣兒收淚笑老眼顧人疑夢
入鄉闕屢魂應軀幹離一春三避賊十事九成悲

八

翠巘幾曲折往來三數家搗皮催作紙擁焙看烘茶山
盡始見日溪晴時露沙武陵知便是隔岸有桃花

九

賊去方燒縣兵來復打城艱難唯有骨生死兩無情欲
住家何有謀歸計未成人言李御史滿腹是精神

十

可怪子劉子全家肯見存長分夜雨榻復共草堂樽磊
落吾何取笑言君益溫它時此心在結草報深恩

侯元進賦待鳳堂佳句見邀同作

見說封君竹風枝飽歲寒會看雙鸞驚飛下碧琅玕惡

鳥良復厭閒花吹自殘絕知門可款夢對小檀欒

題趙鈴家墨牛圖

昔我築室花姑川短蓑青帽耕春田一犁落盡芑葉雨
雙犢自分春草眠向晚歸來臥牛背小巷疎林日猶在
繫牛柳下門未關隣翁攜酒牛邊醉回頭往事無十年
田入富家牛賣錢草荒春隴賊燒屋十口有家無一椽
眼昏頭禿不如意此畫一見心惘然河間豈是田家子
書多自可天祿比平生眼厭玉驂騮水牯作圖聊復爾

北陌東阡喚未歸空遣農人告春事田間望月看吳牛
老子從來乃如此便當火急解龍泉換取四蹄耕雨水

賊後收拾殘書作

此生空作短檠痴老去猶慙閱市資豈有鄴書猶挿架
更無班史可充飢今朝過眼亡三篋它日還君欠一瓿
亂葉紛披在懸磬春風可是故相欺

燕欲來巢

亂後烏衣巷欲空擬尋茅舍伴蓑翁戲將鷁去春風裡

銜得泥歸暮雨中
炙手不嫌門戶冷
傍人如獻語言工
明年記取來時節
應是桃花滿院紅

三月三夜得梅花數枝燈下作

故人遠客天一涯
寄我萬里風前枝
方壺含澌不受汗
可着玉樹瑤林姿
孤芳妙質不可說
天香肯復須人知
老人不作世間夢
但見玉友如兒時
急張青燈當明月
要看疎影橫屏幃
花寒不睡斗欲落
笑語似與人追隨
持杯未怪此宵樂
論情忍負平生期
回頭却憶青山道

處處相逢花不老
短籬飛雪山更寒
古木啼烏月催曉
清魂屢往途路遙
故人久別相知少
只今如此邂逅何
莫厭詩成苦相惱

桓公祠

蘓峻兵方急
桓公氣未平
一身唯死節
四海但孤城
歲月人間夢
功勲紙上名
可憐山下老
澆酒問陰晴

次韻元進寒食感事

寒食江天雨弄晴
夕陽花草一川明
持盃欲下它鄉淚

上冢寧無故國情漸喜三春逢禁火會須五斗解朝醒
知君屢作東萊夢我亦飄零歎此生

次韻元進再示

屋角鳴鳩喚晚晴眼驚新火一番明
兵戈處處傷時事花柳村村惱客情
無復御廊分冷食只將蹋鞠醒春酲
德公上塚知何日滿眼春愁太瘦生

雨後過琴南岩

夜雨喧旅枕曉徑深春泥奔流自山來
轉眼忽渺瀰微

生抱羈蹇老病凌歊危青山岌當前客意恍若遺空崖
倚天立怪石從雲垂雲間笙簫聲隱約天風吹斯人已
仙去孤蹤邈何之釣石屹中流誰來把綸絲一水繞山
麓淺碧涵漣漪長年抗塵容照水羞華髭羨門不可遇
惜哉吾已哀人生不學仙萬冢空累累于今豈未可撫
事聊獻歎

讀樞密張公梅雪二詩公諱叔夜

禁中頗救誰最良上前論事張子房張公九尺鬚眉蒼

談兵說劍眼為方，金城有策若未試，便恐談笑無戎羌。
時平不用臨邊手，乞得南州作醉鄉。黃堂酒盡客未起，
清畎風多未自長。只今白雪醉中句，猶帶東閣官梅香。
單于敢挽射日弩，當年誰上東封章。王城三月斷信息，
賊軍螳附方跳梁。白頭侍郎最先至，擁兵直入趨咸陽。
中人傳詔天為喜，戎師夜遁軍威張。太宰官高亦動色，
球路帶褫腰金黃。功名無成落邊土，此老此功誰更數。
想得韋韞毳幕寒，夜聽邊聲淚如雨。

次韻元進以長句見勉

一雨俱回草木春
槁枝着葉定何因
煩君筆底三昧句
洗我胸中千斛塵
憂患此生真已了
風烟萬里正愁人
白頭攘臂干戈裡
欲遣何人喚孔賓

次韻元進病中書懷

一竿烟雨釣羊裘
稍負初心只自羞
擬學倦飛雙去鳥
可憐無定一虛舟
未成大隱定小隱
為用人謀更鬼謀
君有胸中經濟策
不須猶說二宜休

次韻元進書事

七尺看君玉作山，倦遊莫賦鳥知還。
大椿本自八千歲，天馬終縻十二閑。
笑我生涯真草草，如公人物未班班。
他時一枕江南夢，猶記相從水石間。

次韻元素見寄

吾曹心事寄微言，此意難從世俗論。
妙句已先醒醉夢，尺書何止到寒溫。
因緣只睡心情懶，習氣唯書眼力昏。
知有草廬能避地，滿村烟雨一柴門。

次韻奉答馮遠猷

翩翩綺紉子粲粲潔衣服朱門酒肉臭不飽膏粱腹淒
迷百草中得比蘭與玉手持白瑤琴欲鼓朱絃曲閱茲
清廟音未易可流俗名家千里駒歷塊步已獨妙年振
華鑣肯折鹽車軸中原暗風塵國步日窘促勒銘樹高
勲要是一變足期君乃如此使我安小築

劉將軍寶刀歌

將軍寶刀玉三尺夜半有光如日赤蒼水使者誰敢捫

蓬頭劍士眼不識鵬鷃膏瑩秋水光切玉如泥不動芒
秋風夜作蛟龍吼人言乃是真干將知君老將家有種
談兵論事書撐腸不願君持此刀日解三千牛願剗月
文作飲器却纏錦條朝未央妖腰亂領不自保豐狐老
獬誰跳梁酒酣起舞為君語時危此劍知難藏

雨過

池面過小雨樹腰生夕陽雲分一山翠風與數荷香素
月自有約綠瓜初可嘗鷓鴣莫飛去留此伴新涼

五月十八日魏宗明官舍作

黃塵白骨已無人青谷朱樓尚有村
今夜三更山吐月
共傾雙淚看金盆

蔡長源以老馬見借駕甚戲作

羸驂已老莫嗔渠涉世迂疎我自愚
馬不能言當臆對
未知吾孰與君駕

吳思道示藏海小集

文物風流數建安此生猶及見波瀾
清詩更遣何人到

餘子懸知一笑看猶恐向來無鮑謝謾勞當日話吳韓
事見李姑溪跋尾知君有意分膏馥老眼空驚白雪寒

讀鄭公奉使錄

勁敵難交玉帛歡只因獻納是爭端鄭公不請長纓去
有口真堪伐可汗

諸公有意勒燕然不道昭陵閉玉闕却遣璫裘窺漢鼎
拜公遺像獨何顏

小蔡許借徐詩未至

馬中未必無驂駟人中豈可無曹劉龍媒西來幾萬里
異士一出三千秋李白坐詩竄夜郎退之論佛流潮州
天公可笑無老眼兩翁憔悴令人愁平生四海黃太
史長庚配月何曾死西江自是南國紀公有高名政如
此人言此老酷似舅坐上拈花獨公喜分得西江一派
流萬古正須公一洗我老耽詩空瘠臞起死鍼盲正要
渠子豈有意能起予書來并寄囊中珠

次韻費茂和風月亭新成

十室熙熙俗自恬
令君豈第不多嚴
簿書遣吏且堆案
風月撩人時到簷
牘種幽花無限好
滿傾春酒十分甜
何勞結屋深防客
清節如君有底嫌

孫耘老酒間出麻姑像要余作詩

青絲一尺高髻鬆
玉顏微駐丹砂紅
雲輶飛來自何許
滿山落葉元無蹤
長天如烟月如霧
便恐乘鸞月邊去
煩君急與問中郎
從此更誰知癢處

夏熱歎

祝融當權不可奪海水欲沸山欲裂黃頭父老見事多
謂有此身無此熱老人何得怨天公山堂日日多南風
烏紗歌帽剪雲葉白髮吹雪飛蓬鬆已挹蔗漿澆熱惱更
注井花回睡容人生如此亦不惡飽食安坐初何功蒙
塵况駐奉天輦避暑望幸驪山宮敵兵入漢作巢窟戰
騎橫戈歲馳突旌旗耀日紅蔽天鐵甲烘雲氣銷骨安
得壯士如惡來上訴帝閭闔鑰開盡瀉天河作飛雨四
海八方無一埃秋禾不槁敵不來我亦高枕喧春雷

送許體之守貴州

人物久哀謝斯文寄渺茫先生推老成詞采今擅場交
遊數輩行猶及是與張大坡渺雲漢小坡與相羊豈茲
絲綸手不入鸛鷺行爾來南中守雨露新漢章南中俱
樂土佩帶安農桑銅花秀鎧甲芝菌生桁楊霜林荔子
熟釀瓮千家香使君嘯鈴閣賓客醉高堂古來多循吏
治行何曾彰願公飲無何坐使斯民康

許貴州出蘇叔黨

老坡騎鯨上天去小坡落筆如風雨能添老樹着岩間
為石傳神自翁語兩坡俱死真可惜君有一拳何處得
誰向九原呼此翁為我五日畫一石

立秋前三日夜雨

殘漏催燈暗風梧帶雨鳴細聽驚夢點渾作斷腸聲乍
冷秋應近無眠句又成愁多推不去頭白更憂兵

亂後併得陶杜二集

少陵有句皆憂國陶令無詩不說歸常恨兩翁埋槁壤

頃驚雙壁墮窮扉風催錦里花枝少草長江南豆葉稀
自古高才多寂寞遺編讀盡淚頻揮

讀徐伯遠書外家遺事作二絕句以紀之并序
繁昌焦洧之妻洪鴻父女也一日遇巨盜于江中不受
賊汙投江而死兩侍兒大曰宜思小曰奴善琵琶有
姿色皆吳氏女本姊妹也亦相隨赴水焉洧蓋伯遠之
舅故著其事甚詳

就死由來不自疑玉顏那為賊鋒低了知今日投淵婦

猶勝當年斷臂妻

殺氣駸駸戰艦驕
春江漫漫濕金翹
但將紅袖供歌舞
却為周郎笑二喬

太倉稊米集卷十

欽定四庫全書

太倉稊米集卷十一

宋 周紫芝 撰

詩四十首

秋旱既久已而大雨

霜旱憂千里靈湫臥蟄龍叢祠亦何力
女覲遂論功凍雨雲霓過秋田寇盜空
飢腸蒙一飽歡甚雪髯翁

夜雨不寐

歲已隨流水身猶轉轉斷蓬秋風雙鬢短
夜雨一燈紅哀

病無多力窮愁莫漫攻殘年消底物溪外兩三峯

次韻羅叔共紀事見寄

羅疎字叔共

中原因干戈此事昔固聞何嘗大江南代馬動成群
躍萬騎入蒼黃兩龍奔五年三避敵十室九見焚相公
既降敵

杜充也

盜賊俱官軍遂令江以南填山滿屯營老

稚五六輩相呼走荒村君昔東道主竄身亦荆榛兩家
三十口既死驚復存共求草中生有似麀與麀平時已
蹭蹬老恨有比身湛湛兩玉壺炯炯無一壘猶喜垂盡

中得此千載人珠璣皎在前自然洗妖氛恨君濟時策
百未有一伸半通猶綰盤兩肘空懸鵠無人作游揚恐
得按劍噴濃雲卷膚寸未許膏斯民念昔仲夏夜赤氣
騰天曛雨足下垂地誅斬當奸臣敵將果夜遁王師策
殊勲班荆記是夕同我二三君君歌獨慷慨淚下霑衣
巾願言補周衮八表均堯仁昆蟲及草木同播一大鈞
良會有如此吾生豈非辰吟君洗兵馬大雅何深醇安
得清廟瑟朱絃奏春溫

七月十八日夜獨坐靜寄月出麻姑背開戶徬
徬夜久不寐

秋日忽復翳暮色橫陂陀黯黯窻戶暗森森修竹多我
懶不點燈枯藤與婆婆青山忽吐月隔竹翻金波須臾
滿幽林歎乃被岩阿開門望天漢星宿方森羅秋風入
梧楸白露濡芰荷夜寒有驚鵲飛鳴繞南柯蒼生願安
枕壯士方橫戈誰能請纓劍故地收關河我意忽不慙
隣鷄復當歌詩成月已落奈此老狂何

次韻魏宗明攜酒小集

山翁爛醉習家池，碎剪黃花點玉卮。
疊疊聽君真有味，皇皇憐我欲何之。
難陪痛飲心先醉，強作朱顏老易衰。
明日囊中有新句，尚堪醉墨寫淋漓。

次韻呂居仁

詩成邂逅得窮愁，眼見郎潛又白頭。
人物向來山吏部，篇章今日謝宣州。

狗監連衡苦未平，秋成戈甲尚乘城。
夢魂幾欲隨公去，

為問高安路幾程

樓上看山酒一卮
人間此樂豈兒知
秋風吹落霜前雁
寄得西來別後詩

白髮書生誰復論
蕭然深閉一蓬門
自知赤壁功名晚
羞與周郎作耳孫

題裴晉公畫像二絕

朝論當年洶洶時
此翁奇事少人知
夢中縛得吳元濟
猶說緋衣是小兒

瘦着輕裘似不勝書生事業復誰能莫嗔小鴨可禽兔
真有禪師解放鷹

玉友初成戲作二首

小瓮鵝黃撥不開晚風吹燴轉荷枯燈前細酌情何限
病後朱顏老却回我亦平生笑餘耳人今何處有陳雷
方從歡伯作幽事莫喚酪奴相繼來

舊交誰復可相忘晚向林中得此郎政恐大兒妨笑語
頻呼小友共回翔坐來烏有聊為客醉後無何即是鄉

多謝故人分玉粒夜燈和雨搗新香

檢故書得舊寫真戲書

楊柳春風濯濯枝深慙張緒少年時期尚有胸中意
種種真成鬢上悲暮四朝三心已了年頭月尾老俱遺
此中空洞今何有曲盡周郎更不知

八月三日早起

金樞壞殘月暘谷賓朝曦九日浴滄海一日騰上枝上
枝邈何許但隱山半規須臾掛銅鉦飛上天一涯光景

被草木畦畦含幽姿微瞰人圓吭飛鳴各嚶咿物意自
欣悅人情傷歲時卷我東窗簾羣山抹脩眉炙背翻故
書搜腸出新詩俟河幾時清種豆落為箕人生行樂耳
富貴終何為丈夫風雲會事業肩臯夔時哉不我與浩
歌君勿疑紉蘭可為佩製荷可為衣駕以白玉虬驂以
蒼精螭翩翩八荒外渺渺天風吹世俗付一笑造化真

小兒

雨作留水西溪漲不可復歸

東谿打槳過西溪南嶺雲飛北嶺時鳥語屢呼人載酒
山行不厭雨催詩靜中秋色人間少客裏泉聲夜半知
老去隨緣皆可耳愁霖未用苦相欺

病中王邦憲見過以詩為謝因以當別

別後衡門久不開壯心消盡已成灰白頭羈客病中老
青眼故人天外來相見有時那易得語離終在莫頓催
山城歸路應殘臘早寄春風嶺上梅

病起負暄菊籬一首

臥疴初肅霜小間倏玄冬老境知幾何半落呻吟中醫
師固楚產砭灼矜神功巫師雖荒怪呼吸生雷風江鄉
鬱毒霧禦濕無鞠窮况復窘行役六月傷蘊隆寒熱遂
百戰藥石徒屢攻槁項與黃馘忒然非昔容逮茲脫九
死更生本蒼穹今晨頗欣悅步我菊籬東無誰與共語
梵誦庶可終憂樂有乘除涉世殊窮通幸茲未暝間有
樂聊復從

送詹伯尹赴三衢酒官

東觀誰臨未見書起居君不解何如懶從瓜隴耕春雨
聊聽糟床滴夜渠滿世棘荆渾未定白頭書尺莫全疎
官曹有祿仍無事看着斑衣從版輿

辛亥冬無雪天氣妍暖如禁烟時書所感三絕

句

夕陽微傍小窻明便遣飛蟲作意鳴天共梅花元有約
誰教草色上荒城

當年白雨打涼州春色還催禁籞遊記得端門迎輦路

輕冰一夜綠楊溝

去年和雪臥榛叢雪裏旌旗分外紅江上只今無盜賊
樓頭昨夜已春風

仁宗皇帝飛白歌

八神警蹕羣靈趨風師雨伯當前驅漢家四葉聖主出共
扶日御升天衢當時農桑三萬里地上錢流已如水左
有稷契右皋夔四嶽九官真濟濟太師當國天下安貂
蟬繡衮身如山范公持節下金鑾名落百蠻毛髮寒鄭

公有口伐可汗可使一言無契丹太平天子坐垂拱
蟬蛸護朝千官侍臣愕立蓬萊殿看草宸奎麗雲漢中
人傳賜宣口勅雨露恩光極昭煥公家什襲宮錦囊五
彩屬天驚夜光試從父老說嘉祐百年厚德知難忘自
從喪亂雙眼暗猶喜人間得時見小臣拜舞喜欲顛安
得身隨千官朝九天眼見萬騎無控弦四海復似昭陵
年

雪中睡起書北窓二首

斷雲疎雨暗樓臺春在寒空不肯回
梅亦羞人花未笑
柳知何事眼慵開久拚雙鬢緣詩老
忍放痴愁入酒來
猶有暮年文字業
睡餘重秩亂書堆

窗下梅花凍玉壺夢回閒聽雪
跳珠樽中酒盡何由得
枕上詩成可自娛
身世固應渾是夢
功名知己不成盧
明朝醉倒春風路
試問黃公覓舊壚

次韻元素自東臯寄新詩
賊退猶未久

北風代馬自長鳴
月到南枝鳥共驚
留我小溪回短棹

看渠紅旆作長城人思龐老皆知隱賊說康成亦畏名
亂後欲從君一笑滿林荆棘未堪行

先生老去以詩鳴亂定詩來眼倍驚但把明珠照兼乘
未須白壁換連城人言陶令嘗耽酒我識玄真不釣名
晚日追隨嘆才盡始知天馬足能行

奉聖山中邂逅忻師相與話十年舊事為之惘

然二十一日同遊陳侍講附子園偶作此篇
不見跳珠已十年舊遊重說固依然此生如我豈非夢

到處逢師真是緣
倦客來看栽藥圃
先生昔侍講經筵
人間作計無多子
也合歸耕種穀田

過石壁

兩峯夾天高一水繞山麓
鳥道盤山腰下臨千仞谷
仰視寸草青千章羅巨木
轉峽瀉哀湍驚雷裂坤軸
日月所隱庇光景不到目
道險當捨車重趼摩兩足
不知誰鑿空穿穴入山腹
平生蜀道難耳目聞見熟
茲山亦尤物初未掛史牘
了知天宇間萬險自重複
窮人重鎔銖

凌冒取危辱歲晏霜雪多歸途戒當速

出石壁

倚空山嶄巖平地石齟齬脩途繞危磴千里無寸土山
高不見日霧重自成雨入壁天始明出壁日過午青蒼
斷崖谷開豁見天宇稻田碁局方梯山種禾黍道傍兩
三家稍稍聞笑語始知在人寰邂逅得徒旅僬僬飢欲
啼遊子歡自許攜孥老一屨白髮無處所何當把春犁
望月耕隴畝閉門了殘年危磴不復取

徽州道中觀山

老去心安一味閒
江南江北飽看山
不知今日徽州路
始落千岩萬壑間

暖日岩花上翠藤
半岩松桂聳亭亭
南來到處無山似
喚作東川小錦屏

上饒道中望月岩

瘦馬度莽蒼悠悠
忽長年群山不知
數袞袞來眼前忽
逢天上月下掛蒼
崖巔炯如碧玉玦
中空竇雲天岩柯

亦薄相為作蟾桂圓陰晴無顯晦千古長嬋娟坐令馬上夢憶我江南川江空月自吐萬頃含風烟靜聞欸乃聲入我獨宿船誤從塵網中見似喜欲顛何當追昔遊擺脫區中緣買地結茅屋攀雲躡飛仙朝吸白露光暮飲山根泉清歡倘可結浩歌與周旋

於潛道中戲作

徐娘雖老風流在學得啼眉時世粧只有於潛舊家女但攜篷沓嫁新郎

收伯尹三衢書

近有南州使雙持赤鯉魚花時孤客淚亂後故人書一
別真如許三年少定居時危消息好老去莫情疎

正月十日雪

維時孟春月歲事司勾芒微陽力猶弱未足扶百昌風
伯偶偃旆電師亦潛光堅冰頃欲解蟄戶不肯藏群陰
勢未屈寒飈忽飛翔積陰既得泄雪意亦異常痴雲迷
瀕洞烟水俱蒼茫行人有墮指裹足畏前岡疎梅強解

事一笑矜芳香誰憐百草死萬木寒仍僵東君始用事
抗此凜冽剛那知假微暎乃復為此祥幽人解春衣酒
券僅可償倚此數日暖蒼黃索衣裳萬事多反覆天心
難重量賴我有殘榼聊足資清狂此意誰復論醉眼空
望羊

銅爵研

藁街夜腹空燃脂可憐漢祚終陵夷老瞞自在作家主
欺它寡婦并孤兒洛陽宮殿皆頽圯更作高臺車天起

臺上吹香十里聞
臺下洗粧漳水渾
當時歌管一消歇
回望西陵空斷魂
百年歲月中
鳥花不長妍
人易老
臺傾人去不復存
碧瓦澄泥為誰好
那知流落向寒窻
乞與詩人賦花草

次韻伯尹見寄二首

種種星星苦見侵
已無心作四愁吟
三秋令我頻成夢
一月勞君幾嗣音
臭味每嗟無草木
因緣已定只山林
此心耿耿從誰語
遺恨依然淚滿襟

從古何人解識真
夜光欲到了無因
只今懷璧還歸趙
它日揮毫有過秦
餘子不應需厚祿
此郎寧合坐長貧
白衣蒼狗俱成夢
富貴功名不在人

次韻常元明寄侯元進

道常字元明
宣之詩僧

丞哉風味似崔侯
松下行吟萬事休
亂後只應堪一笑
官閒如此復何求
看花欲下春衫淚
射月先憂塞草秋
賴有道人三昧句
為君一洗向來愁

太倉稊米集卷十一

欽定四庫全書

太倉稊米集卷十二

宋 周紫芝 撰

詩三十九首

和趙鵬翔贈李生

趙翼之字鵬翔宣城主簿李生善畫京師人

人間作畫如作詩妙由心得非人為五日一石十日水
此事無乃亦可期向來鄙恕先妙手真復奇經年不肯
下一筆胸中邱壑誰當知忽然有興不可遏寫作槎枒
風雨杖回頭却笑閭立本緩急與人為畫師李生聞是

成遠後一生落魄唯飲酒貴人金多不可呼閒日為多
畫日偶心知公子非俗人平生筆底波瀾翻故作滄江
與巨石要看萬里風濤相吐吞誰知此老不足數自笑
一生常苦辛桃花水暖小艇窄十年辜負江邊春時危
力小去未得畫圖入眼空傷神

次韻韋深道哭陳諫議

韋許字深道

自是羣姦誤聖君初心豈願作忠臣平生勁氣埋黃壤
當日嘉言在紫宸諫議裂麻方伏閣諸公鳴玉自垂紳

向來六子俱誅滅此道于誰較屈伸

諫議謂陳東

叔達許分萱柳二栽作二絕

華顛老去幾霜秋知處元應不奈愁但得稍分花到眼
誰能更覓地埋憂

鋤荒已出墻根路剪綠仍分雪後栽便與數椽容我老
當留一徑待君來

謝元不伐寄靈岩七詩用梅聖俞韻

靈岩勝絕天下稀開鑿乃自太古出山名初豈有顯晦

勝處要須詩黼黻自從梅老登列仙尤物誰憐久埋沒
具茨筆力扛九鼎坐遣清詩入山骨據龜食蛤誰與遊
絳節雲車到仙窟雲間招手疑有無月下吹簫真彷彿
飛雲香藹風吹香翠潤空濛雨垂濕誰從洞口看金書
想對神清時獨立我家靈岩山脚底識面何由恍如失
雖無幽夢到三山尚有明珠容什襲

送別徐南美

謀臣如雲將如雨欲剪天驕奉明主御營飛詔肅虎貔

妙畧縱橫自神武誰騎馭馬蹄雙朱夢從璜溪親帝輿
手提大鉞殺兩將日御少却公重扶此公堂堂出當國
羣盜相看少顏色江上鯨鯢盡掃除草中狐兔無窠窟
折衝自可銷戈兵寸地尺天歸聖明帳下偏裨何足數
幕中賓客公獨稱願資碩畫戡禍亂坐遣四海歌昇平
書生白首亦安用尚可平戎作短行

送侯元進罷涇溪丞

單于飲馬窺長江巨鼎一沸俱倉黃我攜老稚不知處

流離夜窺涇山陽山中小邑真蕞爾井邑無聲但流水
亂石巉崢虎看人賈客稀疎市爭米憶昔相逢羣盜中
過我天宮寶坊裏人言覓句崔立之恐是前身侯叔起
當官論事嚼寒冰醉後詩成只彈指三年兵火夢中遊
別去何堪日千里人生直氣忌太高論少卑之亦聊爾
功名唾手良偶然邂逅庸奴亦如此如公人物自有餘
似我蒼華真老矣只今滿世尚干戈應念相思遣雙鯉

李使君示開化諸詩

李處勵字勤仲
自衛守移宣

使君一出承明序當年兩佩龜峯魚龜峯小兒騎竹馬
笑挽朱轡歸故閭門外春風吹畫戟小閣香濃綺疏碧
蘓州五字老更奇東陽八詠人誰敵山堂聞說公自開
烟雨遙供翠鬟色更向招提山窟中竹杖穿雲飽經歷
夜上孤峯看明月曉趁鐘魚著僧屐詩成知復幾牛腰
倒廩傾圉公不惜他人舉似與何人知我耽詩老成僻
平日看囊止一錢驚見縱橫著圭璧當遣兒童勿浪傳
按劍從來少人識

贈元具茨二首

時具茨作寧國宰名勛
字不伐具茨其號也

平生結客少年場人物如君見未嘗
早歲風流知漫叟
一時師友是黃香
相從便作雙鳬去
欲見應須一葦航

只恐涪翁門下士九重應合奉清光

勛師山谷山谷
常為作字序

名在金華李孟間流傳佳句落人寰
異時文采今何在
掃地風流喚欲還
賸見分雖有意小
巫自顧獨何顏
源明不恨生哀俗
尚喜人中識魯山

羅仲共兄弟文集為賊所殘

照眼明珠兩陸離機雲兄弟似當時文章未許輕霜丐
神物何為欠護持白壁懸知從間道青氈亦復付偷兒
誰言舉世無蘇曄收得香奩第一詩

何元靜以詩索花次韻詩尾致剪花之約

城南有客身倦遊飯無脫粟衣無裘短牆雨濕花木晚
窮巷草深籬落秋心常自許玉人輩人言恐是原憲流
千奴安得封君祿偶有一花聊可目綵椽作架恐未暇
春到聽花飛上屋衡門無酒客不知寒谷少春花更遲

慙勤未足供一笑慙愧煩君作好詩誰遣春風吹急雨枝頭
會見花無數夜窗月白得暗香曉枕風微戰輕素已辦并州快
剪刀為剪長條送春去君當釀酒買肥羔莫倚怱怱陳草具

後數日以詩償剪花之約

春風吹雲不成雨暖日將春到花塢知君不羨鶴林神
但將詩作催花鼓驚風虐雨一掃空國艷天香為君吐
金刀盟在不敢寒急走送君花滿盤何郎要將湯餅試
不放枝頭朝露乾樽雖有酒莫謾把客未可人誰共看

想當風暖月更白流蘇帳掛香團藥應笑老翁門寂寂
咫尺誰來草玄宅暗香和月與誰同芳條委地無人摘
春與幽姿似少情雨打風翻漫狼藉

送舒永豐

舒賓王字利用少年登科為
信州永豐令終焉宣州人

斯民如草木九聖含春溫秋風一披拂零落難重陳嗣
皇回日御杲杲昇朝暾誰令天驕子欲肆長鯨吞王
師一倡亂諸將皆星奔可憐爾羣蒼終不負漢恩固亦
念顛仆所喜邦本存舒侯名家郎翔鸞未騫騰稍分民

社寄似欲親撥煩盍敷寬大詔力補瘡殘痕勿謂叢爾
邑安能著華軒妙割俱有用雞牛無足言君看密縣宰
視民真子孫汗馬無寸勞太傅豈不尊扶衰其有意願
復矜元元

次韻何君與晚晴

花深雨過一鳩鳴喚起何郎對晚晴暮靄連山明白鷺
夕陽回處帶啼鶯浮生可笑能幾屐萬事政須論一枰
想得追隨共飛蓋玉觴零亂酒催行

次韻劉元素暮春書懷

斷腸風雨落花時
空遣劉郎賦柳枝
涉世功名真螻穴
送春歌吹只蛙池
尚堪短策時乘興
猶有寒栢可共持
更願餘生似東野
雲龍無地不相隨

次韻元素再用前作

春晴無復少年時
那作驚烏夜繞枝
願與君遊雲夢澤
不愁人奪鳳凰池
北窻付我常高臥
手板看渠自倒持
擬伴遺民釣烟水
蕭規真欲效曹隨

元素將與余別再賦前篇因以留之

江頭雲雁欲飛時
倦翮依然在一枝
少貯晚潮青版舫
共聽朝雨綠荷池
伯生醉熟慙空洞
夢得詩高有護持
南浦分襟定何日
懸知清夢與君隨

送元素

重來樽酒定何時
藜杖同誰把一枝
雅量久知吞夢澤
高飛猶恨隔天池
凌烟事業歸驃騎
樂府歌行付總持
自載筆床茶竈去
喜君風味似天隨

次韻元不伐暮春再遊俞氏園期任道卿劉長孺不至

素心失前期幽事縈老念小築猶未成殘年作逋欠五
字俯見投光芒肯收斂遐想徒意消從遊知禮僭流離
兵盜餘有籍猶未占尚想南岡花依依弄殘艷棲遲倘
會意往返殊未厭如何兩公子盟寒久無驗我語良可
刪公當為磨玷載酒苦未能茲焉負深歎

春晚絕句二首

春來白水欲平田未拆鞦韆已禁烟傷雨落花空著地
倚風輕絮解漫天

鳥聲時向靜中聞盡日陰晴漫不分庭下落花如落絮
眼前春思似春雲

訪張元明山齋

張賁字元明池之
青陽人為宣司理

張侯詩似嶺雲間飛鳥何心只願還醉裏有官如物外
眼前無客似山間來聽春枕連宵雨看畫秋屏着色山
老去此身無處用固應容我作躋攀

次韻張元明書劉氏草堂

草堂聞出碧雞西一色桃花去路迷有眼固應元自白
無腰畧可為人低池塘看浴雙鳬雨簾幙時銜燕子泥
想得君家舊蓑笠依然猶在太真谿

四月二十八日江元楷置酒坐客皆醉臥已而
主人亦就睡戲作數語以紀其事

西園春事闌歌管罷絲竹青錢落高榆幽鳥轉空谷江
侯不能閒折簡到吾屬淨掃南窓塵共把一樽玉重觴

各類然睡味久乃熟齁齁兩鼻雷艷艷當筵燭因知歡
有餘誰謂飲不足偉哉三玉人曾不愧坦腹應憐俗子
陋禮法困窘束坐中飲濕生起舞自成曲主人亦忘客
去留隨所欲可笑陶淵明欲睡客須逐

題張元明四鬼捕懶龍圖

五月江南地無黍帝遣雷師下行雨百神受職羣龍奔
一龍藏頭翳玄雲雷師奮虬叱四鬼拽取老龍朝帝
閭張侯直氣不可屈雲間睥睨旁怒嗔歸來面壁脚一

吐畫作新圖走兒女潛此怕死不肯行夜叉飛天髮毛
豎人間空笑虎頭痴筆底風雲遽如許今年雨足年亦
豐蜥蜴蠃蜓俱論功龍方下避千里赤疾雷破柱頌天
公天公有令那得爾寄語痴龍莫辭死

次韻趙伯武病中即事五首

臥疴念經時勿藥有新喜便應走駸駸誰復稱起起嘯
歌理壺觴婆娑在窻几想當呼濁醪與客談妙理

二

趙侯佳公子妙伎數三絕對君如春水煇煇消內熱一
為藥石誤良會能契闊便當亟相過共此良夜月

三

愛酒知有癖耽書久成痴官曹足餘暇幽策約屢枝但
恐叢葭陋繆倚瓊玉姿况無彈丸手突過黃初詩

四

病餘春已歸飛花滿空堂萱草欲成窠戎葵粲微黃高
門有賀客新篇怯初嘗人生貴強健餘事亦渺茫

五

平生沈東陽鶴骨儼如故朝來聞巾車載酒定何處暮
歸坐東軒翰墨有佳趣當時烏絲欄為乞錦囊句

送費茂和二首

費介字茂和
嘗宰宣城

誰言令尹拙催科鞭朴當如豈弟何樓下久傳于薦曲
人間方唱紇那歌虎知低首須應殺雉已成雛不可羅
太史若書神爵傳慈祥未媿昔人多

前賢零落謾知名後輩何由識老成誰遣斯民俱臥轍

因知循吏本無聲眼前公事何時了月下清樽且復傾
想得新栽池上柳送君歸棹亦多情

汪才任寺簿得劉遺民釣臺于涇水之上將作

小亭而未暇有詩次其韻

汪伯虎字才任旌德人

眼前時事只紛紛林下誰來弔逸民
斷石至今留故物赤欄何日照江濱
飄流歲月人空遠料理風烟意轉新
擬借一椽垂短釣此生真欲繼前塵

秋暑臥病示莊簿

莊革字時然為宣城簿

老火倏已盡金行殊未剛弱囊漸可剥七月猶驕陽赤
日不可嚮白汗驚流漿誰將窮谷冰為我濡枯腸况茲
老病軀息偃真在牀敲秋損風玉微颺襲衣裳言念北
征士萬里方拓疆秋雲靜邊日光耀劍戟場君今飽韜
畧論事時抗章諸公頗動色有策云甚良何當給鋒車
結佩朝明光一鼓收關河再鼓擒戎王兵戈既靜洗不
復憂邊防萬夫各解甲四海均清涼

雨後微涼再示莊簿

籌收始用事健行肅乾剛微颺生浙瀝一雨洗亢陽香
羅阮團扇玉腕辭蔗漿况蒙慷慨詞猶激卑懦腸當食
忽亡匕起立遂失床鷄鳴中夜興呼燈攬冠裳自從兩
河割四海失故疆向來桑麻區中作荆棘場黔首未安
堵皂囊思獻章聞有圯上書今代誰張良風雲須嘉會
日月依未光當宁方側席誰能薦吾王鷺鳥尚垂翅老
眼空望羊秋風一夕起撫事增悲涼

觀大閱


落日鳴笳鼓西風卷旆旌熊羆千騎肅錦繡一川明
猛士方投石將軍未請纓不須誇劍舞卻教是書生

復愁二首

秋風嫋嫋秋雲愁寒日耿耿還西流昏鴉接翅帶遠水
暮雨滿山昏北樓微涼漸欲入枕簟白雲復恐霑梧楸
橫戈壯士半茅土雲壑布衣悲素秋

江南郡邑半成灰江北諸藩信不來此日兵連殊未解
向來邊釁復誰開三關故地何時得二帝征鑾幾日回

白髮草萊無遠策時垂雙泪只興哀



太倉稊米集卷十二

欽定四庫全書

集部

太倉稊米集卷十三至五

詳校官庶吉士_臣李如筠

主事_臣呂雲棟覆勘

總校官編修_臣倉聖脉

校對官中書_臣高中

謄錄監生_臣范廷麟

欽定四庫全書

太倉稊米集卷十三

宋 周紫芝 撰

詩四十八首

次韻馮遠猷夜雨屋漏有作

我昔在田間秋霖傷歲熟常憂床床雨夜下東屯屋飯
牛起晨耕短蓑聊擲沐違濕因五遷勞形真僕僕坐歌
南山梁那惜清夜促平生小馮君秀齒梁冰玉生餘華
屋姿豈識雪濡辱誰知折角巾肯念滹沱軸會將秋雨

謠寫入朱弦曲知君有過秦妙畫行見錄袞衣坐法宮
當寧調玉燭吾廬雖獨破受凍死亦足

飲魏宗明家分韻得酒字

閉門苦秋炎散髮臥北牖小雨度微涼西風颯哀柳起
邀馬服君步過雲中守雲中雅好事酌我玉卮酒諸公
飲方豪何曾問升斗而我纔飲濕已復困濡首臭味本
自同初何間能否不然瓊瑤林何以着老叟歡同一笑
間義重千載後脫彈無新詩刻燭媿敏手詩成慎勿再

坐客驚欲走

感韓碑用李義山韻

長蛇封豕矜雄姿弄兵三世窺
皇義自從羣騎入中土
僥倖歲月寬誅夷錦纏紅帕五十載
肯輸赤豹兼黃羆
憲皇神筭本天授指顧不勞戈
一揮元和上相拜元帥
黃金鑄印手自持三軍踏雪砍壙入
夜摩賊壘朝奪旗
侍中西平老將種屬鞭拜舞行相隨
緋衣小兒却健武
未怕賊首如虎貌功垂竹帛不可掩
名在萬古誰能訾

行軍司馬號大手蒼珉承詔鑱瑰詞平生直筆有公議
從人乞米知羞為狗功須賴發縱者盡勒殊勲歸鼎司
宮中小女強解事歛衽雪涕垂豐頤締章繪句隨斷裂
厖恩下沛驚淋漓空餘大雅配吉甫

元和聖德詩云誰
作歌詩以配吉甫

春秋廟享存歌詩當時左右無諫者應慙鳴佩趨龍墀
襄陽太守獨何事殷勤自刻平吳碑將軍更勒燕然石蠻
風瘴雨侵蟠螭張功耀武示萬世二子無乃為已私晉
公純德古未有彊藩悍將親平治羣奸聞風膽為落自

奮老拳擒宛脾都人尚想白羽扇野蔓已埋黃絹詞唐
家晚歲事如此誰令舉世躋純熙君不見鄭公之死肉
未冷停婚碎石恩還追文皇英明猶復爾功臣誰肯躬
胼胝玉谿慷慨書萬本要識元老為邦基

寄題元具茨雙梅菴

高節知公冠九州梅花却對令君羞詩如往日陶彭澤
人是只今陳太邱挽得繁枝供宴坐小分疎影入清流
簿書堆裏渾無事玉雪中醉即休

讀東坡儋耳新詩

先生流落久居夷屬國前身事已非
萬里岷峨空入夢七年海嶠不思歸
枕椰葉暗蠻村雨荔子紅垂瘴嶺扉
政坐詩窮關底事雲鵬誰道摠卑飛

東坡有雲鵬今
悔不卑飛之句

次韻時然惠徽州近作

莊侯四海習鑿齒鸞栖一枝亦聊爾
沸鑊那尋袞處州獨跨羸驂度徽水
羊腸路繞十八坡危磴天懸三十里
捫參歷井不復休一握去天真有此
軍符夜下星火急

吏習文書日填委青山倥傯未可厭方外周旋人有幾
坐看雲生拄頰間便恐詩成橫槩裏萬壑千岩入句來
天遣江山助奇偉我昔經行五嶺頭芙蓉峯高天正秋
淒音怨曲不成調細雨寒烟空復愁曉得新詩驚欲倒
句似當年山色好一生忍淚泣秋風可笑區區郊與島

題呂節夫園亭十一首

呂節夫兄弟買地築屋于麻川之上鑿山疏泉種藥藝
花為遊觀之所十有一官間則居之食不足則出而仕

當世高之其弟仁父為余道其名且使賦詩

雲林堂

高情惡喧囂結屋傍空曠草堂寄雲林遠目聊自放偃
蹇良不疑世情真可抗不知堂中人誰同倚藤杖

半隱寮

顯晦固有時出處本同致乘流與遇坎等是一戲事真
隱了無心寧須論朝市君看半隱名是中有深意

歲寒坡

山中與誰語俗士不我過時攜登山屐間上歲寒坡不
知青女威柰此蒼官何從今桃李花漫漫空復多

朝陽臺

殘月壞金樞朝曦吐暘谷南臺凌日觀杲杲明萬木白
露亦已晞桐陰轉簷曲危坐讀黃庭想像巾一幅

衆芳閣

草木有盛德俗眼未易觀幽姿不可見微香在林間植
我東籬菊藝此九畹蘭芳意似有知為君笑朱欄

藤洞

雲山渺無何地勝餘草木蒼藤飽風霜天矯作岩谷幽
香出空洞清樾交翠麓想時攜客來班荆對碁局

學圃亭

疏泉灌空畦折柳樊小圃關心有幽事寄意在衡宇但
恐經綸人茲焉忽高舉慎勿厭荷鋤烟蓑濕春雨

卷書閣

機雲佳兄弟胷中幾石渠萬事資不理三篋補有餘它

時策高勲已復得異書安用結飛樓傍架時卷舒

舒嘯軒

淵明磊落人啾唧倦吟諷聊將舒歎聲一為洗喧闕寄
言梟獍徒請勿恣嘲哂君看半嶺間依稀有鳴鳳

越香堂

佳木寄深塢自與春有期幽姿誰復省軒軒頗矜持真
賞倘已逢清香襲人衣士為知己死此語良不欺

容安軒

生理須幾何安分一枝足向來高明中百鬼作禍福何
如此衡茅長年樂幽獨慎勿將蝸牛輕比蠻與觸

金華老人分老潘點漆墨十月二十三日久雨

新霽弄筆北窗戲作此語華嚴經云須彌山
筆大海聚墨不能書寫一字法門

老來窗几漫塵埃誰與潘郎點漆煤一字法門書不得
又撩風月作詩媒

東窗對雪六言四首

月觀雲臺何處瑤林玉樹誰家幻成銀色世界雨此天
女寶花

天淨銀潢渺渺林寒玉珮珊珊有月時翻瑤草無人來
踏瓊田

擁鼻駝裘不暖澆腸蟻榼還空助我茶甌玉雪煎成石
鼎松風

睡起山驚堆玉詩成研欲敲冰飄瓦莫嫌碎點打窗留
伴寒燈

聞雪二首

黃昏雪意未全成
寒入重衾曉更清
風裏未看穿幕片
夢中先聽打窗聲

朔風初喚夢魂回
曉枕時聞急雪來
未有春衣堪換酒
明朝誰辦送寒杯

次韻莊簿對雪

月姊雲冠玉作膚
白鸞飛輦下天衢
欲酬平地雪三尺
正要澆愁酒一壺
林下閉門須好句
廟堂調燭費嘉謨

它時瓊佩朝銀闕共醉寒江記老夫

讀外舅高晉翁詩集

結髮論人物傾心慕老成
掃門嗟齒暮洗眼失冰清
心苦彈冠嬾名應脫屣輕
眼高空爾輩醉熟自平生
長嘯蕪門冷微顰下蔡傾
千兵森武庫五字築詩城
鮑謝篇章麗陰何句法精
聳牙徒自放貞耀復誰旌
草露功名薄春雲歲月更
鴨頭江自綠馬鬣墓還平
蹤跡荆襄在文華劍佩榮
塵編愁獨把清淚一縱橫

吳幾聖許分蠟梅栽二首

林下幽姿惱殺人書來分我月黃昏
杜陵老子堪憐許枉乞桃栽一百根

越羅新學染宮黃不著紅藍一點粧
移取綵衣歌舞樹莫教曉夢怨餘香

幾聖以三詩寄蠟梅栽次韻

寄將琢玉風前句剪送和香雪後枝
要識此花真面目細看無色畫中詩

釀蜜成花此似難移根深恨老來看豐肌弱骨須調護
可怕寒梢白露團

慣見江邊雪樣梅此根常恐自天來懸知老去醉中眼
便是姚黃花嬾開

次韻沈給事對雪長句二首

時元用
守宣

洒天飛雪被長巒落絮繁風醉後觀塞上餐羶公獨記
月中回棹我知寒已書上瑞歸天闕又挽豐年到筆端
懸瓠功名知有意微生底處更求安

翠失千峯與萬巒
銀宮闕縱奇觀
樓空翠濕衣裘重
詩就風生齒頰寒
聊與江山分絕致
浪陪樽俎問更端
莫嗔郢曲無人和
七子風流負建安

次韻莊時然徽州山下見梅三絕

凍蘂寒梢也自芳
斷橋深塢獨聞香
山中行處花吹面
馬上歸時詩滿囊

雪後花開人未歸
津亭誰共把寒杯
句中解道梅如雪
夢裏可無人似梅

春到梅梢雪作堆
庾郎愁眼為誰開
白龜城裏未曾見
徽嶺句中渾寄來

雪將晴聞梅已有開者

臘雪自知春欲回
凍雲元不耐朝暉
便須急買尋山屐
莫放梅花一片飛

題雪堂大研一首

河間多書人共知
未見紫岩方玉池
東坡老人上天去
流落人間君得之
寶匣初開眼光眩
相約君家與同看

麝煤靈霽雲滿天尺壁堅溫玉微汗峨眉山高兩蘇出
自是斯文有秦漢先生著書書滿家晚得窮愁坐城旦
只今蠶尾人爭傳異時龜趺不須斷百年榮辱一夢餘
空與高人作奇玩安得大手揭陽君為我銘此元賓研

次韻具茨老人觀臘月十五日按兵

六花陣合紅滿川鼓聲喧旌暗天錦裘繡帽不動鞭
腰鞭兩弓誰更先城狐社鼠空百千一呼辟易投戈鋌
霹靂晝射蛟螭淵妖星夜落蚩尤躔穀城老父書誰傳

可為帝師策萬全脫兔一出忽復旋風聲鶴唳驚虛弦
常山蛇勢孰後前四頭八尾屢變遷何止內政分軌連
部伍聊足相糾聯勢如漂石奔流泉蒙衝未數浮江船
三軍不用呼飛燕功成唾手豈待年長安賊平不改鄧
萬里玉關沉夕烟降王曳組未解纏白麻曉下彤庭宣
兵雄澤潞非公賢談笑自足空戎邊

沈元用太守和具茨詩張元明兩用其韻見邀

同賦

漢陽千騎嘶秦川六龍御日升中天翠鑾親巡耀寶鞭
神武自作諸將先子陽盜據衆萬千井中蛙腹不受鉞
虎頭誰敢當文淵一洗萬古空英躔風威已落諸蕃傳
上兵伐謀軍貴全固應玉陛當周旋朱幡猶此閱望弦
安危以身誰肯前願扶國步整播遷勁兵出塞鏖祁連
長纓曳首來翩聯盡驅酋長朝甘泉未慙驃騎羞戈船
先聲旋下齊與燕稱觴拜舞呼萬年黃童佩犢無征鄧
農桑萬里通人烟蓬頭舞劍空腰纏要分頗牧來藩宣

古來千里制一賢長城未必能防邊

橫谿小市再宿慨然有感

小市人烟南北頭清江賈客去來舟兒時風物依然在
老去光陰不奈愁可憐白髮無好意更對故城思舊遊
烟塵蓬勃兵火急歲晚棹歌歸去休

夜宿長林明日遊仙壇宮

麻川過長林路轉無百里積雨斷津梁日亂十六水忽
從岡阜間稍得十家市凌晨上仙祠遂作折屐喜水流

自汪灣山亦甚雄偉小邑頗下臨擾擾屯聚蟻一笑相
與言黃冠有仙子為言庭前菊霜餘爛黃藥採之制顏
齡可以堅髮齒不須事虛曠至道亦良邇神仙固可學
吐納乃餘事斯言雖甚簡中亦含妙理

星源逢共兄弟別後道中奉寄二首

曉色淒迷客夢長賈胡留滯更他鄉自隨匹馬家千里
眼見故人天一方霜落駝裘朝著帽雨來山驛夜分床
與君相別無多日已聽鳴鴻欲斷腸

十年四海不解甲一日三秋更憶君別後光陰逐流水
老來蹤跡似浮雲心懷邱壑情雖在眼暗風塵首重分
滿眼尚添新戰骨何年真起故將軍

苦寒二首

朔風吹雪天漫漫厚地欲裂江水乾懸知北客未省見
太古以來無此寒冰簷垂筍風撼屋布衣生稜體生粟
老翁炙手厭朱門明朝晨暾更堪曝

天容黯慘悲風吹寒日欲出寒雲垂千門晝閉人跡絕

萬里長空鳥不飛
豺虎號寒聲怒急
行人指墮毛為立
易水風高燕地寒
白頭書生望雲泣

具茨老人讀書寮

具茨四壁無斗儲
載行書多常滿廬
胸中崑崙幾石渠
三篋補亡無復餘
起居誰不解何如
校書著作虛詔除
元元本本窮古初
雌黃付與金銀車
竭來窮山歲三徂
催科政拙民力蘇
黃童佩犢耕菑畲
戴白未見空歎歎
焚香晏坐臨綺疏
三年不識園中蔬
邇來結屋聊卷舒

手抄平生未見書，曼倩兩目如懸珠。
四十萬何多，與較公所得。無錙銖，門生校讎誰與居。
我欲從公路，鬱迂著鞭何時跨。
蹇驢不求奴，飯馬青芻得公竒。字歸自娛，送元具茨歸黃山。

元祐宗師數聖朝，兩公分路久揚鑣。
具茨人物真竒偉，雙井風流未寂寥。
可怪魯山猶簿領，不應聾叟是漁樵。
何時收拾江湖句，歸作歌詩補舜韶。

太倉稊米集卷十三

欽定四庫全書

太倉梯朱集卷十四

宋 周紫芝 撰

詩四十九首

乞蠟梅

老翁真是可憐人，却覓花醫病眼昏。
乞取疎枝更疎藥，莫論桃葉又桃根。

臘盡冰消未見時，春風應入近南枝。
懸知老樹開花早，苦恨幽人得句遲。

秀淮亭晚眺

時往
無為

未得三吳去東來且過淮
要須煩曉浪聊為洗風霾
飄泊從人笑窮愁費力排
平生臨水意老去若為懷

次韻趙師是題烏江連雲觀二絕

項王才器固無雙秦鼎雖輕可獨扛
豐沛故人如不用濟師猶得問長江

連雲臺上倚闌干著眼何妨盡日間
公子胷中有雲夢更須為助借江山

送潘擇之尉南巢

潘若虎字擇之恩榜入仕

潘郎曾中有文藝白髮青衫初試吏少年欲射漢庭策
晚乃去作南巢尉寒廳結屋八九椽導騎挽弓三數輩
但願君如梅子真人物風流亦何媿

題善應師母我菴

賢僧
日成

今君無我亦無人誰識毗邪妙悟身宴坐只應山是伴
夜禪唯與月相親支郎好馬元成癖懶瓚垂洩却是真
更待衆生揔無病萬金良藥不妨神

元夕訪忍母我已睡復起

殘缸零落數枝紅
春在空濛薄霧中
月似冰輪人似玉
車如流水馬如龍
山僧睡起三更後
遊客閒來一笑同
明暗短檠君莫厭
此燈無盡法無窮

次韻忍母我春日三絕句

暖入平林轉鳥鵲
日烘花氣滿庭隅
道人元不關春事
肯把新晴餉客無

雨餘繞屋一渠水
日落滿簾何處山
我亦時來開病眼

怕將春色照愁顏

春意全灰病後心
粥魚齋鼓聽禪林
鳥啼南嶺夢初斷
花發故園人懶尋

燈下讀韓致光外集

吳宮花草弄纖柔
西子粧成特地羞
笑我老情難媚
愛渠好句儘風流
香奩詩在人何處
斷腕名高事已休
更欲與誰論此恨
遺編讀罷一燈留

春寒

寒意苦未解春陰連晝靈文書堆午枕風雨閉寒齋花
落空驚眼愁多欲滿懷客情須一醉安得酒如淮

試湖陰徐道久筆

山中三窟遭蕩焚十年遺種無初雲管城已老既謝事
柔毛遂出收微勲騷人手握奴隸管人間自此無猶薰
徐生晚出頗自喜妙伎天與人皆聞羝羊退舍粟尾避
族非東郭不肯論往歲江南說諸葛至今有口皆能言
眼前厚利聊取足身後典刑寧復存駢牲自是犁牛出

忠臣豈但孝子門古來取士貴閥閱未必元成俱有孫
送孫秀才兼寄達道人

當年御史凜霜風見說金狨玉面驄汗簡有名知不朽
皂囊無橐豈非忠夢思故國兵猶滿身落它鄉路更窮
只有老禪真具眼識君應在典型中

魃魞

放飭朝盤空食指昨夜動軟玉開香包桃花點春瓮平
生江瑤柱異名寔同用何當登禹書永作淮海貢

淮軍及境而退喜甚成詩

近喜橫戈隊南來
偃旆旌瀕江猶樹柵
帶甲謾持兵夜
柝初寒枕春田已趣耕
使君今尚父應便是長城

題米元章祠堂

繡谿遺跡已茫茫
父老時能說漫郎
蒼碣尚餘唐翰墨
古祠猶是晉衣裳
旌旗還向江湖老
簷廡空悲草木長
我亦敢持寒具手
為公來炷影前香

次韻魏定甫早春題咏

臘雪初晴梅欲花有人聞說鬢如鴉清詩勾引江南夢
應向今宵還到家

三十六番風未回微紅難倩剪刀裁魏侯句裏有春色
不打涼州花自開

雨後桃花可意紅一川楊柳醉春風舞衣歌扇重撩理
百尺朱樓烟樹中

白頭憔悴未歸身羞作須江入社人自是愁多無好句
不關詩瘦與傷春

柴扉春亦借融和客少高軒誰肯過醉裏我應慙畢阮
詩中君合是陰何

正月十八日謁客意甚不樂已而過正師猶未
起書小詩窗間而已

玉壺花暖日烘窗奪我寒衾曉夢長慙愧高人方擁鼻
小爐沉水宿殘香

張老借東軒晝睡

誰言知處是閒愁一入華胥萬事休借得東軒還宿願

何須雲夢澤南州

畦蔬一首

并引

余旅寓既久而食益不足乃畦舍西之地植野蔬而食之聊以當肉課藝有成情見乎詩

猗嗟老人如水中槎攜壺挈榼泛宅浮家飄然北來寓此一蝸食無畎畝衣無桑麻藜苳滿腹雜以蜺蝦以鼓我腹妻孥笑譁旅人之食豈曰不腆不足則求我顏亦覲乃即舍隅蒿萊是剪藝此春蔬侵畦覆畹雨葉風枝

忽其滿眼擷之掇之以芼以烹聊以當肉亦足彭亨搖
喉澤吻茹蘗啜羹如天酥醅飯在家僧彼哉膏粱孰為
重輕安得長江載揚我於買地五畝抱甕躬耕駕言聿
歸以畢餘生

解人敦武郎富君為余言解池廣二百里其利
不貲又有六小池官雖置戍以為厲禁而民
寔擅其利或悉以屬縣官則鹽不復成其事
頗怪作小詩以紀之

天意懸知損有餘
小池分水計非疎
誰知當日蕭丞相
亦解區區說海魚

春日小詩三首

亂離回首又春風
江上人家一半空
燕子多情依舊舞
桃花無語可憐紅

烏鵲啣紙欲成窠
寒食羈愁不奈多
夢到鹿門親上冢
花前老淚欲懸河

兵戈無地可窺臨
風物依然惱客心
未有鶯時春欲盡

已無花處綠成陰

抄宛邱先生集見和許貴州詩因以悼之

臺閣諸公盡要途一麾新拜嶺南除當時為我歌新句
別後何人哭訃書夢斷世間青瑣闥醉傾天上碧琳腴
平生交舊孺張輩餘子紛紛可作奴

米元章為須江太守聞有怪石在河壩莫知其
所自來人以為異而不敢取公命移置州治
為燕遊之玩石至而驚遽命設席拜於庭下

曰吾欲見石兄二十年矣聞者以為言坐是
罷去余遊濡須而石猶在詢之邦人信然乃

作此詩

漫郎與世苦不偶倣儻如公世安有平生學書筆似錐
晚歲得州大如斗淮西道院長江邊天公付與公高眠
使君閉閣作奇字門前白浪春風顛人言異石天所出
三十六峯如洞天亟呼我兄更再拜俗眼相看頗驚怪
喚錢作兄真可憐喚石作兄無乃賢望塵羅拜良可笑

米公拜石不同調
愚智相懸乃如此
何啻人間三十里
是非從古無公論
彼此相笑何時已
巉岩對客初不言
堯桀紛紛渠自爾

芍藥今歲著三花

春歸那肯為儂留
尚有三花慰客愁
十里紅樓卷珠箔
不知誰在古揚州

羣山臺暮雨

傑觀凌寒江朱欄
俯平野羣峯江上來
屹立羅萬馬山

客多態度顯晦入模寫朝雲結烟鬟翠色遠相射夜月
橫脩眉娟娟亦閒雅天生此尤物政復為閒者馮夷翻
怒濤汹汹激風榭神女亦將雲時從楚臺下造物出奇
傑娛客助揮洒時方苦積潦百里無十舍我雖非官曹
對酒那忍把人生急行樂有味如啖蔗悲喜有乘除歸
愁耿長夜

須江暮春雜題三首

三月陰晴江上天江花落盡水平川紅蠶老去桑垂椹

黃鳥飛來柳撲綿千里心常懸夢裏十分春揔在愁邊
時時更謝蘇司業乞與杖頭沽酒錢

須江舊事與誰論萬古悠悠入夕曛楚子名今推伍伯
阿瞞功獨蓋三分空埋冶父山邊骨已散濡須塢口軍
欲為英雄弔遺跡筆頭無古戰場文

淮上風埃滿客衣二年樓閣送斜暉心如落絮隨風去
春與殘花作伴歸塞外夕烽悲鼓角江邊飛雨濕旌旗
只今便覓東臯路已失南山種豆期

寓舍雜題三首

久作乘風去重尋聽雨眠更無輕絮落又見小荷圓
芍藥何人種茂葵一笑妍亂離歸未得且復此經年

老去書中得心因病後哀栖栖身是夢種種鬢成絲
鳥自知時節人猶說亂離倚樓天萬里無地置吾錫

客路猶飄泊江山未定居賣刀安得犢彈鋏竟無魚
一飽非難事平生不願餘但能休旅枕便可稅征車

客舍有井極深而寒今歲大暑日汲以供盥濯

喜甚賦此

重廊陰陰與天隔下有井泉餘百尺乍垂修綆已復寒
深注花甕不勝白山城夏旱百井皆盥濯從誰問涓滴
暮年來此看老黥日倚銀床卷深碧炎官火傘空自張
玉川清風已生腋翰林醉熟呼不醒宮中誰賦花娉婷
中人傳詔玉起立井花吹面詩還成詩成白雪真同調
咫尺回姿妃子笑此郎自是醉謫仙肯作官家詩待詔
北窻老子貪晝眠蓬頭突鬢良可憐但將飽睡答長健

安得新詩追昔年我生無譽亦無毀老去功名薄如紙
日向山堂洗睡容空費君家一壺水

六月十二日過笑菴道人頗出近詩

無人與作繡川遊共看荷花一雨秋乞得道人三昧句
破除千斛庾郎愁

來尋午枕林間夢分得羲皇牕底風且與笑庵同一笑
不知家在大江東

笑菴兩和前韻復作二絕

莫把須江作浪遊
笑菴如水氣如秋
但知有道能忘我
便恐無天可寄愁

新詩時出笑談中
清似松江夜雨風
邂逅碧雲來入句
老夫真欲媿遼東

徐使君送冰

江南地暖不藏雪
六月無冰破煩熱
俱在炎官火傘中
暍死行人不堪說
今年渡江當入淮
淮人蔭子恰復開
淮人謂藏冰
處為蔭子
眼明一見玉壺面
彷彿肺腑無塵埃
使君

忽遣鈴下走金盆分似來鈴齋方圭圓壁不可數玉峯
中立高崔嵬蔗漿退舍不入口井花避席當停盃我生
坐甑安得此借以清風亦聊爾明年公復侍甘泉御府
分光照窻几却憶敲冰餉野人回望江城在千里

寓秀師房

寂寂疎窻秋更催班班菊蕊為誰開山曾有約終相負
鳥解嘲人怪復來閱世了知心是夢倒床須放鼻如雷
又從白足西庵老共試齋餘雙井杯

雨過涼甚

龍脚蜿蜒苦未收，亂雲攜雨過西州。
倚欄斜日到烟樹，回首數星橫夕樓。
樂歲豈關羈客事，好風聊為老人留。
今宵枕簟涼如水，又向華胥作爛遊。

望黃山

宿雲忽解馭曉色，明朝曠高秋。
寓遠目萬象，秋毫分羣峯。
雜遝來突騎，從橫奔驂騑。
獨驤首迴出，凡馬羣嵩高。
實維嶽羅列，如兒孫玉京與金闕。
亭亭在雲巒，羣仙驂

蒼虬冠珮朝至尊往者風露夕妙奏聞清圓名理以絃
歌異事父老傳丹成已仙去流脈在山根至今茲山下
幽泉湛餘溫安得從浴沂聊以濯我冠一沐去塵土再
沐生羽翰朝遊參安期暮躅追羨門振足八荒外垂手
青雲端

太倉稊米集卷十四